

ቅዱስ ዮሐንስ እብ ነያረት ልትዐየድ



ክሉ ሽዑብ ኤረትርያ ገዢው ሰነት ሽርሐው።

እሊ ክእነ እት እንቱ እብ መናሰበት ቅዱስ ዮሐንስ፤ እብ መዓወነት እዳረት አቅሊም ግብለት፤ ወዛረት እዕላም ወሙዲርየት ሰንዐ። ለትዝመ በርናምጅ ፈን፤ ዮም 11 ሰብተምበር እት መዲነት ሰንዐ። ትቀደመ።

እተ ሓክም አቅሊም ግብለት አሰይድ ኤፍሬም ገብረክርስቶስ

ወቃእድ ሀይአት አርካን ቅያደት ምግባይት ጅብህት ብሪጋዴር ጄኔራል ስምኦን ዕቅቡ ለልትረከቦ እቶም ሰብ-ሰልጠት ሕኩመት፤ ሚርሐት ደያናት፤ ሰብ-ገጽ ወወካይል ሽዑብ ሙዲርየት ሰንዐ። ለሐድረው እቱ በርናምጅ፤ ሙዲር ሙዲርየት ሰንዐ። አሰይድ ህዝቅያስ ወህበት እተ አሰመዐ ከሊመት፤ ሽዑብ ኤርትርያ እተ ሐልፈ ሳምንመ ዒድ አልአድሐ ወዝክረት 56

ሰነት መትአንባት ንዳል ክፋል መሰለሕ እብ ገበይ ናይረት ክም ዐየድ እት ሽርሐ፤ እሊ ምስል በዓል ቅዱስ ዮሐንስ እንዴ ተሓበረ፤ ዓዳት ተዓይሽ ወሰዋልፍ ሽዑብ ኤርትርያ ለወድሕ ክምቱ እት ለሕብር ገዢ ሰነት ሽርሐ።

ለእግል ሐድ ሰለሰ ሳዐት ለአተላላ በርናምጅ፤ ፋርቀት ዓዳት ዋልታ ናይ ወዛረት ድፋው፤ ክምስሊህመ ናይ ለመድ ፋርቀት ዓዳት አቅሊም ግብለት እብ ቀደመዉ ጽባዋ ናይር ዐለ።



አሚን ዓም ቅዱስ ሲኖዶስ ኦርቶዶክስ ተውሀዶ ቤትክሰታን ኤረትርያ፤ ብጹእ አቡኔ ሉቃስ፤ እብ መናሰበት በዓል ቅዱስ ዮሐንስ እግል ሙእምኒን ወዐዝ አሰመዐው።

ብጹእ አቡኔ ሉቃስ እት ልእኩቶም፡ “አሰናይ እት በዓል

ቅዱስ ዮሐንስ ኦብጸሐነ” ሐቀለ ቤለው እት ቀበት ዐድ ወኻርጅ እግል ልትረከቦ ሙእምኒን፤ እብ ሕግም እት እስብዳልያት ወኦብያቶም ለህለው ሐማይም፤ እት ዐማር ወድፋዕ ወጠን ለልትረከቦ አንፋር ቅዋት ድፋዕ ኤረትርያ፤ እብ ዓመት ህዬ እግል

ኩልየት አሰመረ 333 ሙድርሲን ተአድሕር

ኩልየት አሰመረ፤ እብ ዕሉም ተድሪስ ተእሂል ተሀይዞም ለዐለት 108 አዋልድ አንሳት ለልትረከቦ እቶም 333 ሙድርሲን ሙረሽሐን፤ እት ዮም 9 ሰብተምበር እብ ሸሃደት አድሐረት።

ሙዲር ናይል ኩልየት መምህር አለም ገብረቃል፤ ተዕሊም አሳሰ ዐባት፤ ሙድርሲ ህዬ አግደ ሙወጅህ ክምስል ቱ እት ለሐብር፤ እት ለትፈናተ አውካድ ልደሕር ለህለው መአህለት ለእግሉ ደርሰው እብ በቃዐት ወመትሰባል እግል ልሸቀው

እቡ እብ ስም ገዢ፤ መዳርስ ለሐሰ ፍገሪት እግል ልሸጅለ መስኢት ክምስል ትገብእ ሽርሐ።

ወኪ'ለ ትደሕረው እብ ተረቱ፤ ምህነት ተድሪስ መስኢልየት ዐባይ ለለአጸወር ምን ገኡ ምህነቶም እብ ተአረፈምተ መስኢልየት እብ መትሰባል እግል ልክደም ለሰምቱ መዳላይ አከደ።

እት ደንገቡ፤ እት ወዛረት ተዕሊም ሙዲር ዓም ቅስም ብሐሰ

ወጠወርት መቅደረት በሸር አሰይድ ጴጥሮስ ሀይሌማርያም እተ አሰመዐ ከሊመት፤ በቃዐት ወመትሰባል ናይል ምህነት እግል ልጠወፋ አሳሰያት ጠባይዕ ክምቱ አትፋቀደ።

ቀደም እሊ እብ መአሰሰት ተእሂል መዐልሚን ከድም ለጸንሐ፤ እት ሰነት 2015 ህዬ እት ደረጃት ኩልየት ለትጠወረት ኩልየት አሰመረ፤ ሐቅ ሕርየት እብ ዓመት ሐድ 11 አልፍ ሙድርሲ እንዴ አድሐረ እት ሸቁል ክምስል ፈ'ረ ወሳእቁ ለሐብር።



እት ገበይ አሰመረ-ከረን ብቆት መኪነት ትሳድፍ

ማሌ ለህ ዮም 11 ሰብተምር ሳዐት 6፡30 አምሱይ እት ገበይ አሰመረ - ከረን እብ ሳይፈት ብቆት መትብላስ አውቶቡ፤ ሰዋግ ከብእቶም 9 ምን ሙሳፍሪን ክምስል ሞተው ወኪል ኤሪን እግል ከሰሶም ጀሃት እንዴ አሸረ ሐበረ።

እሊ ዕልብ ታረገተ ER 3 A1675 ሳተ 32 ነፈር እንዴ ጸዐነት ምን አሰመረ ለትብገሱት ናይ ብሕተ አውቶቡ፤ ዲብ ባካት ሸንድወ ክምስል በጽሐት ቱ ለብቆት ሳይፈት።

እብ ብቆት ደረር ትፋድ ለሳይፈቶም

12 ሙሳፍሪን ዲብ እስብዳልየት ከረን ወሸቡህ ሐክር ለሳይፈቶም 10 ነፈር ህዬ ዲብ ሕክምን ዔለበርዕድ ልትራዐው ክምስል ህለው፤ 2 ምን እዙያም ላኪን እግል ሐሰ ዕላጅ አሰክ አሰመረ ክምስል ትንደአው፤ ሚዲካል ዳይረክተር እስብዳልየት ከረን ዶክተር ያፌት ገብረሚካኤል ሽርሐ።

ሰብሰባ ብቆት ዲብ መርመረ ምንመ ህለ፤ ሸፋግ እግል ልግበእ ክምስል ቀድር ለንምም ሐብሬ ክምስል ህለ፤ መመርምራይ ፖሊስ ተራፊክ ዐደተክሌዋን መሓሪ ደበሳይ ሐበረ።

አቁርደት፤ ሰዳይት እግል ዓይላት ሹሀደ

እት ሙዲርየት አቁርደት፤ እተ ሐልፈ ሰማን ወርሕ ሐድ 2.5 ሚልዮን ነቅፈ ሰደይት እግል ዓይላት ሹሀደ ክምስል ትደፈዕ፤ መስኢል መክተብ ወዛረት ዐመል ወደማነት እጅትማዕየት አሰይድ የማኔ ክፍሉ እግል ኤሪን ሐበረ።

ለሰደይት፤ እት 15 እዳረት ደዋይሕ እግል ልትረከቦ 546 ዓይላት ሹሀደ ክምስል ተሀይቦ ለሸርሐ አሰይድ የማኔ ምስል ሽቃለ አትሐደሮት ደገጊት እብ መትዓዋንመ እግል ዓይላት እብ ደረጃት መዕየ ለትፈናተ ሰደይት ክምስል ትገብእ አፍሀመ።

እጅትማዕ ምጅልሰ ውዘረእ ገብአ



ምጅልሰ ውዘረእ ኤረትርፖ የም 7 ሰብተምበር 2017 ቀደም አድህር ዲብ ቃዕት ሀገር ዲብለ ወደዩ እጅትማዕ ዲብ ክልሉት ዐባዩ አጃንዳት በህሉት ዲብ ዐገል ወሄራር ፈፃልየት በራምጅ ወከደማት ተዕሊም ወፃዩየት ፋዩሕ ንቃሽ ወደ።

ምጅልሰ ውዘረእ ዲብ መጃላት ተዕሊም ዲብለ ወደዩ ንቃሽ፡ ዲብ ወደጆት ለትሳወ ከደማት ተዕሊም ለተሰርገለ ወራታት ዐቢ ክምቱ፡ ክምሰል ፍገሪቱ ዱሉይ ለህለ አሳሰ እብ ቀሎ-ቀሎ ክምሰል ኢልትረኡ እንዴ አሸረ፡ ቅያሰ መሻረከት ምዋጥኒን ዲብ ዐገሎ ተዕሊም ዲብ ሰነት 2016/2017 ዝያድ 740,000 እግል ልብጸሕ ቀዳሩ፡ መሻረከት አንሳት ዲብ ክሉ ደረጃት ተዕሊም ምሰል ውላድ ተብዕን ዲብ ልትዋሳዌ መጽእ ሀለዮቱ ለለአትናይት ፈግሪት ክምተ ጌመመ። ዲብ አትሓያሰ ኑዕየት ተዕሊም ላኪን ልሰዕ ጸገም

ትሩድ ክምሰል ለትሐዜ ዲብለ ሕሰ ወመትጃግራይት ደረጃት እግል ልብጸሕ ህዩ፡ አሰክ እለ ለተሐለፈ ተጃርብ እብ ፋዩሕ ትጌመመ። እዳረት ወራታት ተዕሊም፡ አሳሰያይ አትሓያሰ እግል ልግበእ እሉ ክምሰል ለትሐዜ፡ እብ አሳሰ እሊ ውዛረት ተዕሊም አሰክ እለ እምብት፡ ለህሉት ጌማም እግል ደረጃት ወአፍየሎት፡ እብ ክርሰ ሌጠ እንዴ ኢገብእ እብ ናይ ካርጅ ሰብ ሽራከት ክምቱ እንዴ ጌመመ፡ አሳሰያይ ተቅዩር እግል አምጸኦት ለለአቀድር አትሓያሰ እብ ድግማን እግል ልግበእ፡ ለመሰኡልየት ህዩ እግል ውዛረት ተዕሊም ሌጠ ለተርፍ እንዴ ኢገብእ ናይ ክሉ መአሰሳት ሕኩመት ወመጅትመዕ ዶር ክምሰል ለትሐዝዩ አትፋቀደ።

ምጅልሰ ውዘረእ ዲብ አክዶት ለትሳወ መትመዳድ መዳርፍሰ ታርፍ ለህለ ሐድ ክፋል እግል አትመጥት፡ ደረጃት በቃዕት ተዕሊም እግል

ወቀሎት፡ ናይ ተክኒክ ወምህነት ተዕሊም እግል አፍየሎት፡ ጠሉብ መደርሲን ወመደረእ ተዕሊም እግል አትመጥት፡ መትነፊዕ ቴክኖሎጂ ሐብሬ እግል አውሰዶት፡ ክድመት ተዕሊም እብ መጅብ ወጠኒያይ ስታቲብ ወመሕበረ-እቅትሳድ ወጠሉብ ዐመል እግል አትራተዕ ዲብለ ረከዝ አርእስ እንዴ ሀደግ መጃል ተዕሊም ወእንሳንያይ አርዛቅን እት ተማመ ዲብ ፍዕል እበ ተውዕል ስትራተጅየት እግል ልትዋሎ ክምሰል ወጅብ አትአመረ። ሕዲን መደርሲን እብ ፍንቱይ ዲብ ረዩም ብሩር መሐገዝ አላት ተዕሊም፡ ክምሰል ከረ ለባራቶሪ፡ መክተበት፡ ቴክኖሎጂ ሐብሬ፡ ዲብ ዐደየት ደረጃት ተዕሊም ለሳድፍ ቅያሰ ቅያብ ደረሰ፡ ገሌ ምነ መታክል ዐባዩ ናይለ መጃል ክምቱ እንዴ ጌመመ ህዩ፡ ዲብ አርሀዮቱ ፋዩሕ ንቃሽ ወደ።

ምጅልሰ ውዘረእ ኤረትርፖ፡ እግል መጃል ዓፍየት ዲብለ ትናወለ እቱ፡ ዲብለ ሐልፈ ሰኒን ዲብ ክሉ ድዋራት ወጠን እብለትፈናተ ደረጃት መአሰሳት ዓፍየት እንዴ ተአሰሰ ሽዑብ እብ ከማሉ ክድመት ምን ቅሩብ ለረክብ እቱ አብካት እግል ለሀሌ ለገብአ ወቀይ፡ ለለዐዴ ወለስሐብብ ሕማማት እግል ራቀቦት፡ ቅያሰለ ለአጀርዩ ደረር ዲብ ለዐቤ መጽእ ለሀለ ለኢለዐዴ ሕማማት እግል ሀወናት፡ ከደማት ክታብት እግል አፍየሎት፡ ዓፍየት ገቢል እብ ዓመት ደሐን እማት ወአጀኒት ህዩ እብ ፍንቱይ እግል አድመናት፡ ወጀዶት ሰራይ እምበል አትካራም እግል አከዶት፡ እንታጅ ሰራይ እግል ጠወርት፡ መቅደረት አዳም ናይለ መጃል እግል ወቀሎት ለገብአ ወቀይ ንጹፋ ለህለ አሳሰ እግል ትሉሉይ ዐባት ሴድያይ ክምቱ እንዴ ጌመመ፡ ዲብለ መጃል ለህለ መታክል ወተሕድያት እብ ፋዩሕ ሀደግ እቱ።

እብ ኑዕየት ለሕሰት ክድመት ዓፍየት ወጀዶት፡ ዲብ ረዩም ብሩር ምነ ሀለ ነኦይሽ መአሰሳት ዓፍየት እንዴ አምበትክ አሰክለ እብ ደረጃት መርጃዒ ላቱ መአሰሳት፡ ደረጃት ክድመቱ፡ መሐገዝ፡ በቃዕት መባኒህ፡ ናይ መርመረ አላቱ ወመሻቀዶታቱ እብ ተርፋሲል እንዴ ደረሰ፡ ጌማም ዓም እግል ልግበእ እቱ ክምሰል ለትሐዜ ህዩ ትፋህመ። ሰራይ ናይ አፍረዮት መቅደረት እግል ወቀሎትመ ለገብእ ዐለ ጸገም እበትወቀለት ደረጃት እግል ልተላሌ ቀረረ።

ዲብ ደንገብ፡ ዲብ ስታት ሽቅል 2017 ናይለ መጃል ይማም ሚዛንየት እብ ተፋሲል በርበረ።

ምጅልሰ ውዘረእ ኤረትርፖ ዲብ ደንገብ፡ እብ ርኢስ ኢሰያሰ አፈወርቂ ለቀርብ እቱ፡ እግል ሓድር ተጠውራት ሰያሰት ወዲብሎማሰየት መንጠቀትን ለከሰስ ተውዴሕ እንዴ አተንሰ እግል 5 ስዶታት ለወደዩ እጅትመዕ አትመመ።

እት ምዴርየት ሐመልማሎ ለከድም 20 ሐረሰቶት ምኖም ለክዉን መሕበር ለመልኩ መሸርዕ ተዋብ ሐ ሐሊብ ሱጥር፡ እተዩ እንዴ አዜደ ጠለባት ናይለ እተ ድዋራት ለልትረከብ ዐዳጋታት እግል ወጀዶት ጅህድ ወዴ ክምሰል ህለ፡ ርኢሰለ መሕበር አሰይድ መሐመድ ሳልሕ እድሪስ ሸርሐ።

እግል ኤሪን እተ ሀበዩ ሐብሬ አሰይድ መሐመድ ሳልሕ፡ እት ምዴርየት ሐመልማሎ ለህለ ጠለባት እግል ወጀዶት፡ እት

ክል አምዕል ምን 300 አሰክ 400 ሊትር ሐሊብ አሰክ ከረን ክም ነደኦ ወደሐ።

ለእት ግድም ሕሊል ዐንሰበ ለትበነ መሸርዕ 400 ረኢስ ምን ሐ ሐሊብ ክምሰል ክምክም ለሐበረ አሰይድ መሐመድ ሳልሕ፡ ክል በዐል ሐ ምነ ለዐምሩ ሰዐር ሰር ሄክታር ክምሰል ቡ ሐበረ።

ሰብ ሐ እተ ሀበዉ ረኢይ፡ ቀደም እለ እብ መሕበር ልትሀየቦም ለዐለ ዐለፍ ምን

ሱጥር፡ እተይ ሐሊብ ዘይድ

አትካረመ እት እተዋም ተእሲር ክምሰል ወደ እት ለሐብር፡ እት መደት ሐጋይ ለሳድፍ መሐግዝ ማይ ላኪን፡ እበ ዐለት ዝላም ቅዝር ክምሰል ረሀ ወእት ደማን ለተሀይብ ደረጃት ባጽሓም ክምሰል ህለው ወደሐ።

ሙዲር ምዴርየት ሐመልማሎ አሰይድ ያቀብ እድሪስ እተ ሀበዩ

ሐብሬ፡ ለመሸርዕ አሳሰያይት ብንዩት ተሕትየት ናይ ማይ፡ ሰከን ወለልትሐረስ አራዲ ለትወጀደ እሉ ሰበት ቱ፡ ጃንብ ፈዳብ ክምሰል ቡ እት ሸሬሕ፡ እብ ጀህት እዳረት ናይለ ምዴርየት ወውዛረት ሐርስ ለተአትሐዜ ሰዳይት ወመታበዕት ክም ትገብእ እሉ ሸርሐ።

አሰይድ ያቀብ እንዴ አትሉ፡ እት ሐንቱ ኸዛን ሙሻ ወአግዳም ሕሊል ዐንሰበ ለልትረከቦ ሐረሰቶት፡ እግል ክል ምኖም ኦር ረኢስ ምን ሐ-ጋሙሰ ክም ተሀየቦዩ፡ እትሊ ወቅት እሊ ህዩ ለውላደን እግል ብዕዳም ሐረሰቶት ልትሀየብ ክምሰል ህለ እት ሸሬሕ፡ እሊ እት እተይ ሐሊብ ናይለ ምዴርየት ዶር ዐቢ ለአገዴ ክምሰል ህለ ሐበረ።



ጸረትርፖ ዕጽዳሕ

ክል አርቡዕ ለትጠ'በዕ ጀሪደት

መዳልያይ፡

መሐመድ እድሪስ መሐመድ

ናይብ መዳልያይ፡

አድም ሳልሕ (አቡሐሪሽ)

ለይ-አውት፡

ፋጥና አደም

ዘህረ ዐሊ

ተለፎን፡ 121797

ፋክስ፡ 127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284


2^ይ ወናይ ደንጎበ ክፋል

ሓይሳም ቁርኣት፡ ገበሬ ትግሬ ለኢትግብኦ ሓጃት ዶል ሰሜዕ ወልርኤ፡ “እላዲ ምንኮር ወምስትንክር ተ” እንዴ ቤለ መሰል ለሀይብ፡ ለበዝሐ አዳም ህዩ ምንኮር ወምስትንክር ለኢትግብኦ ወኢትጸኔሕ ክምሰል ተ ልፍህም፡ ምን እለ መሰል እለ እንዴ ትበገሰኑ መንኮር ወምስትንክር ክልኢተን ምሰል ተን ገብእ ሚ በገበን? ወሚ ቱ ገብእ ምስጢር ምንኮር ወምስትንክር? ለልብል ሰኣላት ላዝም ቱ እግል ለሀሌ፡ ሰበት እሊ ለገበልነ ለመሰለ መሰል ከአፎ መጽሐት ለተአፍህም ቅሰት ህሌት፡ እለ ቅሰት እለ ምን “ምንኮር ወስምትንክር” ለልብል እብ እስታዝ ዐሊ ዐቤ መሐመድ ወእስታዝ እብራሂም መሐመድ ለትኩብ ክታብ ቅራሐት እንዴ ነስኣናህ ክሉ ቁርኣይ ጆሪደት እርትርዮ ሐዳስ እግል ልቅርኣ ሐሬኑ፡ ከገደም፡ 2ይ ወናይ ደንጎበ ቅሰት ምንኮር ወምስትንክር ክእነ ትመሰል፡

ምስትንክር ግልደትለ ብዕራይ ዲብ ላድድ ለመልህ ክምሰል ሰከ ርኢሁ ዐሊ፡ ገደም ለሽጣረቱ ክምሰል ተዐወተት ወምንኮር መልህ ክምሰል ትሸተተ አከደ፡ ሰከ ፋሬሕ እት እንቱ ስጋለ ብዕራይ እንዴ ሐዩበዩ ዲብ ዐዱ ዔረ እቡ፡ ሻፍግ ዲብ እንቱ ሕርበት ቤቱ እንዴ ቀልዐ ህዩ፡ “እንቲ እሲት እንኪ እሊ ሰገ፡ ዮም ላሊ ኣብሸሊ ምኑ እግልነ ወለ ተርፈ እግል አምዕል ሓራት ሽንፊሕ ውደዩ፡” ቤለዩ፡ እተ ዐርቀይ ልባስ እሲት ላብስ ለዐለ ምንኮር እንዴ ኢነቅም ሐንገሉ ነክነክ እግሉ፡ ምስትንክር ህዩ ዲብ ዐርቀይ ለዐለ ነፈር እሲቱ ተ ሚ ብዕድ እንዴ ኢደሌ ለሰገ እተ ከድቤት እንዴ ከረዩ፡ “ገደም ለሰገ እብ ሰላመቱ ዲብ ዐጃ ኣብጸሐክዉ” እንዴ ቤለ ፋሬሕ ወሻንን እት እንቱ ንዋዩ እግል ለኣትዓይር ጌሰ፡ ምንኮር ለእሲት ምን ድካን እንዴ ኢትአቀብል እግል ሰገ እንዴ ነስኣዩ አሰክ ዐዱ ጌሰ እቡ፡

ምስትንክር ምሴ ክምሰል ዔረ፡ “እንዴ ለሰገ ብሹል ምን ለሀሌ ሀቢን ምኑ፡” ቤለዩ እግል እሲቱ፡ እሲቱ ህዩ ሰገ ርኢየት ክምሰል ኢኮን እንዴ ትትፈከር አሰኣለቱ፡ ምስትንክር ሰከ ሓርቅ ዲብ እንቱ ወእንዴ ልትፈከር፡ “ስምዒኒ፡ አድሐ እብ ሰገ እንዴ መጽኣኮኪ፡ ኣብሸሊ ምኑ እግልነ ወሰሩ ሽንርሕዩ፡ ይእቤሊኪ?” ቤለዩ፡ ለእሲት እንዴ ትትፈከር “አናዲ እብ ሰገ ማጽእዩ ይእንተ፡ አድሐ እናስ ዎርት እንዴ ለኣከ እኹ፡ ‘ኣብ ዕያል እብ ጋሽ እግል ዒር ቱ፡ ወለፍ አምጽኢ ክጽንሐኒ በለ’ ቱልካሁ ማሚ? ሰበት እሊ፡ ኣነ ወለፍ እግል አምጽእ ድካን ግሰኩ፡ ኣነ እብ እንክርዩ ሰገ ርኢየት ይኣነ ወእግልኩ፡” ቱለቱ፡ እለ ዶል እለ ምስትንክር ትክ እንዴ ወደ ሐሰቡ፡

ምንኮር ወምስትንክር



ሐቆ እሊ ገደም ምንኮር መልህ ትልሁይ እቱ ክምሰል ህለ ህዩ አመረ፡ ምን ሐሩቀቱ ብርድ እንዴ ወደ ህዩ፡ “ሰገ አምጽኣኮ አምሰልኩ፡ አዜ ህዩ ደሐን ቱ እለ ምን ገብእ፡” እንዴ ቤለ እሲቱ ቃሸሸ፡

አምዕል ሓራት ምስትንክር እንዴ ምጽኡ፡ “ማሌ ተልሂክ እኹ፡” ቤለዩ እግል ምንኮር፡ ህቱመ ትልሁቡይ እቱ ክምሰል ዐለ አሰኣለዩ፡ እብላህም ክል-ምኖም ከዲብ መልህ ተረቱ ክምሰል ትፈደ አመረ፡ ሰበት እሊ፡ ምድር ብዕድ እንዴ ጌሰው አዳም ብዕድ እግል ልቅሸሽ ትፋህመው፡ አሕድ እንዴ ነስኣው ህዩ ሸቅል እግል ልሕዘው አርድ ብዕድ ጌሰው፡

እተ ባካት ለእግሉ ጌሰው፡ ዎርት እናስ ጽጉብ ጸንሐዮም፡ ክልኢቶም ለመሳኒት ምስሉ እግል ልሸቀው ገመው፡ ምስሉ ሐቆለ ትፋህመው መውዕለቱ እንዴ ገብአው እግል ልሸቀው ትዋፈቀው፡ ለእናስ ጽጉብ ምንመ ዐለ ምን ንዋይ ላተ ሐቱ ወኣት ሌጠ ዐለት እግሉ፡ ክልኢቶም ዲብ ዐድ ልግበእ ወከደን መውዕለት ናይለ ወኣት እግል ልግብኦ አሰኣለዮም፡ ምናተ፡ ለወኣት ሐቱመ ምንመ ትገብእ፡ ክል-ምኖም ከዲብ ሚ ክምሰል ለአወቁ ሸቅሉ ፋረገ እግሉ፡ ለዎርቶም ዲብ ወኣት እንዴ ትፈረረ አምዕል እብ ግዲደ እግል ለኣብልዐ፡ ለካልኣይ ህዩ፡ ዲብ ሸፍር እንዴ ወዐለ አምዕል እብ ተማመ ጨፊዕ ናይለ ወኣት እት ከደን እግል ልድኻክ ሐበረዮም፡ ገደም ሸቅሎም እሊ ክምሰል ቱ ሐቆለ አሰኣለዮም፡ ሸሙይ ታብተዮም ወክራዮም ለእቡ ሸቁ አፍሀመዮም፡ እሎም ክልኣት ቁሸት ክል-ምኖም ከሴሩ ክምሰል ፈረገ፡ ምንኮር መውዕላይ ወኣት እግል ልግበእ ወምስትንክር ህዩ ዲንካይ ጨፊዕ እግል ልግበእ ትዩመመው፡ እናስ ለጽጉብ እተ ወኣት ለልትፈረር፡ እግል ኢትሰፍሬ ለጨፍዐ ሐር እግል ልብለሱ ዲብ ክምሰል ቱ አሰኣለዮም፡ ምናተ፡ ለወኣት ፈራራት ሰበት ተ አምዕል እብ ሪመ ትሰዴ ትውዕል፡ ምንኮር እግል ልክርዐ ወጨፍዐ እግል

ልብለስ ዲብ አሰረ ኮይ-ኮይ እት ወዴ ወለኣራብድ መግሉ ልትቀደድ፡ አሰረ እት ገብእ ልባሉ እብ ዕጪይ በተትክ እንዴ ገብኦ ወርወሐቱ እብ ተዐበት እንዴ ትገለደት



ውተልፈት ለዐይር፡ ምንኮር ህዩ እግል ጨፊዕ ናይለ ወኣት ምን ምስካብ አሰክ ኣካን ረዮም ደንኩ ልውዕል፡ ህቱመ እብ በይኑ ደንክ ሰበት ወዐለ እብ ተዐበት አርወሐቱ ፈግረት፡

እብለ ሓለት እለ ክልኢቶም እኪት ርሐም ገንሐው፡ አዳም እግል ለኣትባዱ ወእብ ሸግረቶም እግል ልትነፈሶ እት ለሐዙ ዲብ ኢትሐሰበት ተልገ ትከረው፡ ዎርት ከእብ እንክሩ ምን ምሽክለት እግል ልትባለሕ ምሰል ነፍሱ ገመ ወሸግራት ሐሰቡ፡ መታክል ሱዳፎም ምንመ ዐለ እበ እሉ ወዱ ሸግራት ክምሰል ልትባልሐ ምኑ ላተ ሸክ ይዐለ እግሉም፡

ላሊ ሐቱ ሐቆ ድራር፡ ዎርት ከሓለት መልህ እግል ልድሌ አድሕድ ትሰኣለው፡ እሰልፍ ምስትንክር እግል ምንኮር ሓለት ሸቅሉ ከአፎ ክምሰል ህሌት ትሰኣለዩ፡ ምንኮር እንዴ ልትፈዋጀ፡ “ኣነ ሐበት ሸቅል አለብዩ፡ እለ ወእት ዲብ ሰዐር አፋህ ሐቆ ከሬት ምን ኣካነ ሕርክ ኢትብል፡ ክምሰል ጸግበት ህዩ እንዴ አክረረት እተ ኣካነተ ዕፍ ትብል፡ ኣነ ህዩ፡ አምዕል እብ ግዲደ እት እካብረ ወርዮሕ እት ኣነ እውዕል፡ እለ ኣነ ራክብ ህሌት ዕርፍ ክሉ ረኣሱ ረክብ አለቡ፡ እንዴ ጸግበት ዶል ተኣክርር ኣነ ምሰል ሰብለ ኣኩውየት እትጋደል ወእተልሂ ሰበት እውዕል እለ

ትርእዩ ለህሌክ ልባሼ እብ ክትር ትልህዩ ክእነ ትሻጠጡ፡” እት ልብል እግል አምዕል እብ ግዲደ ለልርእዩ ክርበት ክምሰል ሰኔት እንዴ አምሰለ እግል መልህዩ ዳገመዩ፡

ምስትንክር እብ እንክሩ ምግላዩ እንዴ አዋፍሐ፡ “አናመ ሐበት ሸቅል አለብዩ፡ ሐዳት ጨፍዒታት ናይለ ወኣት አሰክ ኣኪነት ቅርብት ድንክ እንዴ አበልኮ አምዕል እብ ተማመ እሰክብ እውዕል፡ ክእነ ክምሰልክ ዲብ ጸሓይ አንጎጌ ይእውዕል፡ እሊ እቡ ትዕብ እመሰል እትክ ህሌት ሰካብ እንዴ በዝሐ ዲብዩ ገርብዩ ሰበት ከሰላ ቱ፡” እት ልብል ሓለቱ ሸሙይ እንዴ ኣትጋሪመዩ ወክምሰለ ዲብ ኬር ወበርከት ለልውዕል እንዴ አተምሰለዩ ቀደመዩ እግሉ፡ እንዴ ልትሃጀት ወለኣትግዕም አምሰው ክል-ምኖም ከሸቅል መልህዩ እግል ልጀርብ እግል ልትባደሎ ትዋፈቀው፡ እብ ኣሳስ ውፋቆም ህዩ ምንኮር እት ደኒክ ጨፊዕ ወምስትንክር ህዩ ዲብ እውዓለት ወኣት ትበገሰው፡ አዜመ እበ መክርህት ሸግረቶም ዎርት ከዲብ መልህዩ ክምሰል ተልህ እግል ለኣምሮ ቀድረው፡ ምናተ፡ እሊ መዋዲት እሊ ምን በዲሮም እግል አድሕድ ሰበት ወድወ፡ መረ ኢትሻቀለው እቡ፡ ክምሰል ሓጀት ዓድየት እንዴ ነስኣው ለኣከይ ግብእ እት መቅዋኖም ጸረው፡

ምሴት ሐቱ ምንኮር ወምስትንክር ክምሰል በዲሮም እንዴ ትደረረው እት ልትሃጀት፡ እናስ ለጽጉብ መጽኣዮም፡ ኣካን ሐቱ እንዴ ሐበረዮም ህዩ፡ “ማልዩ ክሉ እት ሎሂ ግብ ህለ፡ ሰበትት እሊ፡ አማነት ትግበእ እትኩም ኢትቅርቡ ወምን ብዕድ ዕቅቡ፡” እንዴ ቤለ ትፋኻዮም፡ ሐቆ እሊ ገደም ፊናሁ እንዴ ሓለፈ ጌሰ ምኖም፡ ምንኮር ወምስትንክር ህዩ ህቱ ክምሰል ጌሰ ምኖም፡ ማሉ እንዴ ዘምተው እብ ሸፋግ ምን ምድር እግል ልትኸር ትጋመው፡ እበ ህቶም ለሐሰቡ ለዐለው እሊ ማል እሊ ዘምተው ምን ገብእ፡ ምን ህቱ ለኣርእዮም ተ ለዐለት ጅርሰት እንዴ ትባለሐው እግል ልትጀሮ ወልትረዘቆ ክምሰል ቱ ዩቀነው፡ ለእናስ ለጽጉብ ክምሰል ሰክበ ምንኮር ወምስትንክር ሰር-

ላሊ እግል አድሕድ ከተሐው፡ ምን ኣካን ጅርዋ እንዴ ወደው ህዩ፡ ዲብ ግብ ለእግሉ ሐበረዮም ጌሰው፡ ለግብ አፋሁ ጸቢብ ትክክ ኣኩን ሰበት ዐሊ፡ እብ ተርተረት እድዮም እንዴ ኣተው እግል ልንሰኦ ሐሰበው፡ ምናተ፡ እምበለ ማል ነስእ ዲብ ቀበትለ ግብ ለትጽንሐም ሴመ አምራም ይዐለው፡ ለቀበትለ ግብ ላተ ብዕደት ጋሪት ትጸኔሕ ዲቡ እንዴ ቤለው ይሐሰበው፡ ህቶም ለኢደለው ዲብለ አፍለ ግብ እግል ማለ እናስ ለተዐቅብ ከጃመት (ሸረክ) ሰከ ከለም ዱሊት ዐለት፡

ምስትንክር እሰልፍ እግል ልንሰእ ለእዴሁ ሻፍግ እት እንቱ ዲብ ቀበትለ ግብ ኣተዩ፡ ዲብ ግብ እዴሁ ክምሰል ኣተ ለከጃመት ምን ቅልጭመ ቀርጨተ ምኑ፡ ለእዴሁ ግርብት ዲብ እንተ እብ ሸፋግ እንዴ ሰሐቦዩ ዲብ ጁቡ ኣተዩ፡ እለ ዶል እለ ምንኮር፡ “አሁ፡ ኣክልኣይ ረከብክ? ተዐወትክ?” እት ልብል ትሰኣለዩ፡ “ማሸለ! ሰነት እብ ግዲደ ለለኣኩብረኒ ረከብኩ፡” ቤለዩ መጸጸቱ እንዴ ከሀለ፡ ምንኮር እሊ ከበር እሊ ክምሰል ሰምዐ ምን ቅያስ ወለዐል እንዴ ትረይሐ፡ “አፎ ናይ ክልኤ ሰነቼ ይእነሰእ?” እንዴ ቤለ እግል ለኣብዜሕ ለክልኤ እዴሁ ዲብ ግብ ኣተዩ፡ ለከጃመት ህዩ ክልኤ ለእዴሁ ምን ቅልጭመን ኣትረፈተን ምኑ፡ እለ ዶል እለ ምስትንክር “ዎይ ኣኩ ክእሌ እዴዩ ትቀረጨዩ፡ ዎይ ኣኩ ምትኮ!” እት ልብል ወዲብ በጥብጠን አፍገረዮን፡ ምስትንክር መልህዩ ህዩ ስጋዱ እንዴ ነክንክ “አናመ ኬር ፋጩል ይዐልኩ፡ እዴዩ ማል ይኣፍገረት እለ ትገመመት ተ፡” ቤለዩ፡

እብለ ገበይ እለ ምንኮር ወምስትንክር እግል መደት ረዮም እግል አዳም ወእግል ኖሰ-ኖሶም ቀሾ ወለኣትባዱ ምንመ ዐለው እት ደንጎበ ላተ ዐመሎም እንዴ ፈግረ እቶም እደዮም ትጋመመ፡ እብ ማል ጸርም እት ልትመትዖ ወእግል ሕድ እት ለኣትባዱ ለወደዉ ኣከይ-ውዳይ እብ አምዕሉ ዐረ እዮም፡ ደንጎባህም ህዩ እብ እኪት ወሕግላን ገብኦ፡ “ምንኮር ወምስትንክር” ለትብል ምብላስ ህዩ ምን መዋዲት እሎም ክልኣት ነፈር ማጽኣት ተ ልትበህል፡

“ተመት”



ሽሬሕ ውዛረት ተዕሊም እብ ሰበት እድንያይት አምዕል አብደዮት ቅዌት



እንቀድር።

አዜ ልታኬነ ለሀላ አሸቃል ምኑ እግል ንወዴሕ።

- አስክ እለ እት አብደዮት ቅዌት ብጸሕ ለሀላ ሰርገል ዐቂብ ወአደቃብ
- እት ለገብአ በክት ራክብ ለይዐለ ድዋራት እንዴ ረከዘክ እብ መቅደረት ወተዋልል ለሰምሐ እት አቃሊም ገብእ ለዐለ ወራታት ዝያደት አደቃቡ
- እብ ሕፍዝ ወተዕቢአት ለትሳነደ በርናምጅ ምህሮ ምን ገጽ አምሱይ ወተእሂል ምህናት አትሐሳሳይ ወአደቃብ
- ደንብ ቅዌት እንዴ ተሀወነ።

ለትረከበት ናይ ቅራኡት ወክታብት መቅደረት እግል ሕፍዝተ ወአደቃቡ ለእግል በርናምጅ አብደዮት ቅዌት ለትከሰተዋ መክተባት ቅራኡት እንዴ አደቀብኩ። እብ ሕፍዝ ለገብአ እት ገበይ መራክዝ ሐዲስ እንዴ ትከሰት (እት ቅዌት ክም አብደዮት ለትቀየመዋ ደገጊት እት ትረክዝ)።

እብ መናሰበት 8 ሰብተምበር እድንያይት አምዕል ቅዌት፡ እብ ደረጃት ዐለም ደዓም እት ዐለ ሸዓር፡ “Reading the past, writing the future” ለትብል እብ ዩኒቨርሲቲ ለትሐላላፊት ልእክት፡ “ለሐልፊ ወክድኑ መርጀዕ እግል መስተቅበልን” እብ ልብል ምስል ሓለትን እንዴ ትመሳክሩ። አስክ ቅዌት ምን ዐድነ ነአሰርት ወዲብ ለትደሀረት ደረጃት እንክርዮ ወመራቀብት ለእንወዴ ዲቤ ክምሰልሁ መለብድ በራምጅ ተዕሊም ዐባይ እት አደቃብ። እግል ንተብዐ ወንሸቁ እብ ውዛረት ተዕሊም ተአትፋቅድ። ኩለን ለክሰሰን እዳራት ወእብ ፍንቱይ እዳራት ምዴርያት እት ሐን እዳራትን እት በርናምጅ አብደዮት ቅዌት ሸቁይ ለሀላ ወራታት እብ ዋጅብ እግል ልቀይመ ወእግል ልወሰቀ፡ ውብዕድ ወራታት ተዕሊም

ሽሬሕ ውዛረት ተዕሊም እብ ሰበት እድንያይት አምዕል አብደዮት ቅዌት

እድንያይት አምዕል አብደዮት ቅዌት ምን ሰነት 1966 እንዴ አንበተት እብ ደረጃት እዲነ እት 8 ሰብተምበር ለትትዐዮድ አሀምዮት ለበ ዕለት ተ። እት ለትፈናተዋ ድወል፡ እብ ለትፈናተዋ አግቡይ እንዴ ትክረት ወገምለት ትውዕል። አግደ ሀደፍ አው ልእክት ፊቃደላ ዕለት ህይ፡ ቅዌት እት ሐቲ ደውለት ኬርዓይት ተጠውር ሱወይ ወመሻረክት ገቢል ሰበት ተ። እግል ትትሀወን፡ ከሲብ መቅደራት ቅራኡት ወክታብት፡ እብ ካልእ ጀሀት ህይ፡ አሳሰ ወመበገሰ እግል ትሉሉይ ምህሮ ወተእሂል ሰበት ገብአት፡ አውለውየት እንዴ ተሀየቡት እግል ልትሸቁ ዲበ እግል አትፋቃድ ለሀደፋ ተ። እሊ ህይ፡ እብ መዝመት ምህሮ፡ ዕሉም ወዓዳት (ዩኒቨር) ናይ መጅልስ ቅራን እት ትትመረሕ፡ ገብእ ለዐለ ወለሀላ እድንያይ ጋር ተ።

እድንያይት አምዕል አብደዮት ቅዌት እት ዐድነ እት ሰነት 2002 እንዴ አንበተት ክል ሰነት ትትዐዮድ ወትትፈቀድ ለሀሌት ዕለት ተ። ዮም ዓመትመ እግል 16ይት ሰነት ትትፈቀድ ሀሌት። መሰለን፡ ደዓም፡ ዝያድ 400 ለገብአ ምን ሰሰ አቃሊም ዐድነ ለትዐደመው አንፋር ለሻረከው እቲ ምህም ወዕለ ውብዕድ ለልአትፋዜዕ ነሻጣት እብ ወሳእል እዕላም እንዴ ትቀደመ፡ ንቃሽ ትሩድ እግል ልግበእ እቲ ወልእክት ሰኔት እግል ለሓልፍ ቀድረ።

እት ወዕሉ፡ እብ ክል አቅሊም እት ሐልፊዩ 15 ሰነት (ምን 2000 ወእንዘ) እት ክል አቅሊም ለገብአ ወራታት ተቅደም አብደዮት ቅዌት ገብአ። እብ ክሰሰለ ትሰርገለ አሸቃል፡ ለትረከበ ተጃርብ ወበራምጅ መስተቅበል ለአርአ ወዲብለ ተለ ሰነዎት ለአክድናሁ መካሰብ እንዴ ሐፊዝ፡ እብ ደቅብ እግል ንሸቁ ናይ ሕበር ፊህም ለትበጸሐ ዲቡ እጅትመዕ ዐለ። “እት ባክትን ቅዌት ለይአብደ ድጌ እግል ኢለሀሌ ሕበር ንሸቁ” እብ ትብል ሰቅራት እት ንትመረሕ፡ እት አብካት ራክብ ለይዐለ እዳራት ደዋዬሕ ወደገጊት እንዴ አተርገዝ

እግል ንሸቁ ለትብል ልእክት እንዴ ሓለፍነ እቲ ህይ፡ ለወዕለ እብ ሰርገል እግል ልትመም ቀድረ።

ምን ሰነት 2000 ወእንዘ እት ሐልፊዩ 16 ሰነዎት ቅደስ ሚልዮን ለገብአ ዐባይ እት ንቃዋ ምህሮ እግል ዐባይ እንዴ ትሰጀለው፡ ምኖም ለቅደስ 800,000 ለገብአ ህይ ለትኡተን እሎም ኮርሳት እግል ለአትምም ቀድረው። ክም ፈገሪት እሊ ጅህድ እሊ ህይ፡ እት ዐባይ እንዴ ረከዘ ለትሰርገለ ሸቅል እት ነኣይሽ እት ልትሀየብ ንዘም ናይ መአንብታይት ደረጃት ምህሮመ፡ እት ዐድነ ቅደስ አብደዮት ቅዌት (Litracy Rate) ሰኔ እሊፋር ሀለ።

እብ ዓመት እት ሐልፊዩ ሰነታት ሕርዮት፡ እት ቀደምት ምህሮ እግል ዐባይ እብ ዓመት ወእት አብደዮት ቅዌት ዐባይ ልግበእ ወዲብ አጀኒት ህይ እብ ፍንቱይ ፍገሪት ሰኔት ለትረከበት ምኑ ሸቅል ትሸቀ። ተአምርተ ናይለ ትሰርገለ ሸቅል ሕበር ህይ፡ እሊ ለተሌ እግል ንሀደግ እንቀድር፡-

- ቅደስ ቅዌት እብ ደረጃት ደውለት ሰኔ ነቅሱ፡ ወክል ሰነት እት ለትደሀረት ደረጃቱ ክም ልትከሬ ገብእ
- ደገጊት ብዘሕ ምን ቅዌት ትባልሐየ (እብ ፍንቱይ እት ደረጃት ዕምር ምን 15-45 ሰነት ለሀለው መዋዋኒን)
- ለገብአ ወራታት ተዕሊም ለኢገብእ እለን ደገጊት፡ እብ አቃሊም ልግበእ ወእዳራት ደዋዬሕ እግል ልትፈረገ ቀዳረን፡ እሊ አሳሰ እንዴ ገብአ፡ እት አቅሊም አውለውየት እንዴ ትረተበዩ ልትሸቁ እግልን ሀለ
- አምር ወፊህም እት በራምጅ ምህሮ እግል ዐባይ እት ሸዕብ ወሰብ ሸርክት ሰኔ ትወቀለ
- እግል በርናምጅ ለታቤዕ ወለትንዝም ምን ደውለት አስክ ምዴርየት ለትትመደድ መቅደረት አዳም እንዴ ትከሰአት እቲ፡ እብ ክል ድዋራቱ ሰኔ ልትሸቁ ዲቡ ክም ሀለ ወእግል ሸቅል መዳሊት ጋብእ ክም ሀለ እግል ንሰሜ



ዐባይ እት ፍዕል ዲብ ተርጅመ ወለአደምነ፡ በቃዐት ተዕሊም እግል ለአተርድ፡ ጀሀል እግል ዲመ እንዴ ካፍሐየ ደማንት ለበ አርደት እግል ልቅፈረ እግል ልትጸገመ ውዛረት ተዕሊም ትትላኬ።

እትሊ ወክድ ጎነ ዐደድ ምሽተርክት አብደዮት ቅዌት እት ዐባይ ወበርናምጅ ዐርዮም እት ብዘሕ ቅደስ ጀሀል ክም ሶም ለልትቀየም አቃሊም ገብእ ሰበት ሀሌ፡ ለልሐመድ ሸቅል ተ። መሰለን፡ እት ሰነት ድራሰት 2016/2017 ናይ ኩሎም ለአቃሊምነ፡ እብ ዓመት 40,000 ለገብአ ሰብ ወአንስ እት ንቃዋ በርናምጅ አብደዮት ቅዌት ክም ሻረከው፡ ምን አቃሊም ለትረከበት ሐብሬ ተአክድ። 17,000 ምን እሊ ዐደድ እሊ እት ውቅል ደረጃት ቅዌት ክም ሀሌት እቲ ለልትቀየም አቅሊም ጋሽ-በርክ ለሻረከው ክም ተም ህይ፡ ለሰጃዕ ሸቅል ተ። እት አቅሊም ጋሽበርክ እብ መዓወት ለክሰሰን ሰብ ሸርክት እት በክት ሓግል ለዐለ ድዋራት እንዴ አተርከዘ ገብእ ለሀላ ጅህድ፡ እብ ደረጃት ውቅል እግል ሊጊስ እብ ንዘም ሸክሉ ዝያደት ክም ልትደቀብ እግል ልግበእ ወክዱ አዜ ተ።

እት አቅሊም ግብለት በሐር ቀየሕ ውቁል ቅደስ ቅዌት ክም ሀለ ሰበት ትቀየመ፡ ምስል ሓለት ጀው ወጠቢዐት ናይለ አቅሊም ለገደሰ አግቡይ ጽብጠት እንዴ ትረሰመ፡ እግል እትሊ መጃል እሊ ገብእ ለጸንሐ ጅህድ ክም ልትደረዕ እግል ልግበእ፡ እዳራት አቅሊም በዳሪታት እግል ትንሰእ፡ ውዛረት ተዕሊም ተአትፋቅድ። እት አቃሊም ለብዕድመ፡ ፈዓልየት አብደዮት ቅዌት እንዴ ትደቀብት ወትሳኔት፡ ምህሮ አምሱይ ለሸምል ወራታት፡ ትሉሉይ ምህሮ ወተእሂል ክም ልትደቀብ እግል ልግበእ ጅህድ ዊደት።

እትሊ ወክድ ጎነ ድሩስ አምሱይ ሐዋን ሰበት ሀሌ፡ አትሐዘዮቲ እንዴ ትረኡ፡ እንዴ አትሐሰሴካህ፡ መዳርስ ሐዲስ እንዴ ትከሰተ፡ እብ ሕፍዝ ለትሰደ ምስዳራት እት ኩሉ አቃሊም ክም ልትሸቁ እቡ እግል ልግበእ፡ ክም ተጅሪበት ቡጉስ ሀሌ። ዝያደት እግል አደቃቡ ወአርሐቦቲ ህይ እግል ልትከደም ዲቡ ተ።

ደንብ ቅዌት እግል ሀወኖት፡ ለመድ ቅራኡት እት ሸዕብ ክም ሰብቅ ጀላብ እግል ልግበእ፡ አርሓብ ወአደቃብ መክተባት ሸዕብ እግል ኩሉ አቃሊም ለክሰስ እት ገብእ፡ ዝያደት ህይ፡ እት አቅሊም ምግብ እትሊ መጃል እሊ ምስል ሸዕብ ወሰብ ሸርክት እትብት ለሀላ ተበረዓት፡ ምልክየት ናይ ሸዕብ እግል ተአደቅብ መትብጋስ እብ ትንዝመ ሸክል ክም ልተረድ ወተጃርብ ክም ልትረከብ ምኑ እግል ልግበእ።

ውዛረት ተዕሊም፡ እብ መናሰበት እለ መስኡልየት ለትአረፊዕ ዕለት፡ እት ኩሉ ደረጃት እት መጦር አጅሀዘት ውዛረት ተዕሊም እንዴ በዋረት፡ ለሳድፍ መሓግዝ ምን ገብእ ወተሐድያት እንዴ ተዐርፊት፡ እት አደቃብ ምህሮ እብ ዓመት ወምህሮ እግል ዐባይ ህይ እብ ፍንቱይ ለሸቀው እሎም እት ተሐምድ፡ እግል ዝያደት ሰርገል ወሸፋገትለ በራምጅ ገለድነ እት ነኣጀድድ፡ ሕበር እግል ንሸቁ እብ ድግማን ትትላኬ።

እት ደንገበ ህይ፡ ከረም በኪተት ወቀይመ እጽጉብ ክምሰልሁመ፡ እንበተት ሰነት ድራሰት ሐዳስ 2017/2018 በኪተት እግል ትግበእ እግልን ውዛረት ተዕሊም ትተምኔት ትሸፈሕ።

“ዐቡ ወተጠውር፡ እብ ምህሮ ወተእሂል!”
ዐውቲ እግል ገቢል!
ውዛረት ተዕሊም
8 ሰብተምበር 2017



11^ይ ክፋል
ወናይ ደንጎበ

መዓል 23 ማየ



ዲብ እለ አምዕል እለ ክፈል-
ጃሽ 52 ህጁሙ ሳዕት 5:30
እስቡሕ እንዴ አምበተ፡ ሳዕት 11፡
00 ዲብ ዐደርዐደ ወጉወ ለትመየ
ጃሽ አባይ እንዴ ጸርገ ድማን
ወድገለብ ገበይ እንዴ ጸብጠ ገጽ
ቀደም እት ልጃርር እግል ዝግብ
ጽበጠ ከአፌት ዐዲ-ሐወሽ ሸኣገ።
እብ ጋዴን ለፈግረ ውሕዳት ህዩ
እግል ሐርመት ቀጸለ እንዴ ጸብጠ
ዲቡ ሐቆለ ተሐየበየ ዝግብ ዔረ
ወዲብ ዝግብ ትመየ።

ዲብ ሕግስ ወርዕዝ ለተመየ
ክፈል-ጃሽ 85፡ እበ ዐለት
እሉ ሕድት መቅደረት ኡዳም
ወሞርታራት ወርዕዝ እግል
ልጽበጥ ህጁም ምንመ ሀረሴ፡ እብ
ጀህት ድገለብ እንዴ ኢልትረኡ
ለጸንሐ ምር ሸለቀ አባይ እብ
ሰምጥ እግል ልህጀሙ ሰበት
ጀረቤ፡ በርናምጁ እንዴ ኢሰርግል
ገጽ ግረ አቅበለ። እንዴ ጸንሐ
ላኪን ኡዳሙ ወሰልሐ እንዴ
ዝመ ግረ ለኢበልስ ህጁም እንዴ
ጠለቀ እግል ወርዕዝ ጸብጠየ፡
ምቀደሙ ዋጅሁ ለዐለ ድቁብ
ሸፍ እት ልትባጠር ህዩ እግል
ጃሽ አባይ እት ኬብብ ገጽ ቀደም
እት ለአተላሌ እግል እምበይቶ፡
ዐዲ-ቀሺ ወዐዲ-ሕድሮም ጸብጠ።

እብ ጀህት ምውዳቅ ጸሓይ
ወርዕዝ ለዐለ ክፈል-ጃሽ 16፡
ወርዕዝ እንዴ ኢትጸበጥ እግል
ልግበእ ለቀድር ሰበት ኢዐለ፡
ዲብ እለ አምዕል እለ፡ ውሕዳት
ክፈል-ጃሽ 16 ቴለል ወርዕዝ ዲብ
ታበዐ ተርቲበን እት ለአትሓይሰ
አሰበሐየ። ሐቆ መትጸባጥ ወርዕዝ
ህዩ ህጁም እንዴ ሀረሰየ እግል
ዐዲ-ቀሺ (ምስል ክፈል ጃሽ 85
እንዴ ጸብጠየ) እግል ዐዲ-ሀከፈ
ምን ግራሁ ህዩ ዐደምዘማት (ምን
ግረ ምስለ መጸአው አንፋር ስለለ
72 እት ልትዓወን) እግል ልጽበጠ
ቀድረ።

ዲብ እለ አምዕል እለ፡ ዲብ
ባካት ተረ-እምኒ እንዴ ገብእ ዳፌዕ
ለተመየ ጃሽ አባይ ደባባቱ እንዴ
ጸብጠ አሰክ ድባርወ አተጀህ።
ለዲቡ ዐለየ ውሕዳት ክፈል-ጃሽ

ለናይ ደንጎበ ሐፍብ ተሕረር

70 እንዴ ካደደ አሰክ አስመረ
እግል ልሕለፍ ህዩ ለትትቀደሩ

ወድገለብ ጽርግየ አስመረ ዐዲ-
ሕወሽ እንዴ ጸብጠየ እት ኩርበ
እምበይቶ ፈግረ እት ህለየ፡ ባካት
ሳዕት 11:00 ህዩ ብሉት ጎዳይፍ
በጽሐየ። ገሌ ክፋል ውሕዳት
ክፈል-ጃሽ 52 እብ ጀህት ዐዲ-
ሐወሽ ወጸሉት አስመረ ሐቆለ
አተየ፡ ምን ጀብህት ግንደዕ
ወዐዲ-ሮሶ እንዴ ልትጌለል
እግል ልምጸእ ለቀድር ጃሽ
አባይ እግል ከፊዕ እብ ሸፋግ
እብ ማይ-ጨሆት እንዴ ወደየ
አሰክ ቤት ገርጊሰ አተጀህ።
ለምን ጀብህት ግንደዕ ወዐዲ-ሮሶ
ለሸክተ ብዝሐ ለቡ ጃሽ አባይ
ዲብ ቤት-ገርግሽ ሸውየ እግል
ልትቃወም አምበተ። ምናተ እለን
ውሕዳት ጃሽ ሸዕቢ እብ ቀሊል
ራቀቢያሁ። አባይ እግል አስመረ
ተረግ እንዴ አበለ እግል ልህረብ
ሰበት አስተብደ ክፈል-ጃሽ 52
ህጁማት እትለ አትመመት።

ክፈል-ጃሽ 85 ዲብ እለ
አምዕል እለ ለገብእት ትግበእ
መቃወመት አባይ እንዴ
ኢልትሃደፈ ክርበ እምበይቶ
እንክር ድማን፡ መርሐኖ ህዩ
እንክር ድገለብ እንዴ አትለ
አሰክ መክረዩ ጥያራት አስመረ
አተ።

ክፈል-ጃሽ 16 እስቡሕ ሳዕት
6:00 ምን ዐዲ-ቀሺ፡ ላምዘ ወዐዲ-
ሀከፈ እግል ህጁም ትበገሰ።
ከገብእት ትግበእ መቃወመት
አባይ ሰበት ኢዐለት ህዩ፡ ባካት
ሰዕት 10:00 አዳሕየት ዐዲ-
ጓዕዳድ አተ።

ዲብ እለ አምዕል እለ ገሌ
ውሕዳት ክፈል-ጃሽ 70፡ ምን
ሰለዕ-ደዕሮ እንክር ምውዳቅ
ጸሓይ ለህለ አካናት ጸብጠ። ዲቡ
ደባባት እንዴ ጸብጠ ዲብሰ ባካት
ኑማጉግ ልብል ለዐለ ጃሽ አባይ
እግል ልሰልም እብ ምር አሲር
ጀዋብ ትለአክ እቱ ወለጃሽ ምስል
ደባባቱ ክምስል ልጸበጥ ገብኡ።
ለተርፈየ ውሕዳት ህዩ እግል
ሸንክት ምውዳቅ ጸሓይ ገጽ
ለሀርብ ለዐለ ጃሽ አባይ እግል
ልክረፈ እብ ደዕሮ-ቃውሎስ
ወቁሽት እንዴ አበለየ አሰክ
ጸዐዘገ፡ ዐዲ ገብሩ ወደናጉል
እንዴ ተሐረከየ እቡ እግል
ልህረብ ጀርብ ለዐለ ጃሽ አባይ
ምስል መምተለካቱ ጸብጠያሁ።
ለእብ ጀህት ምውዳቅ ጸሓይ

እብ መጣር አስመረ ለአተየ
ውሕዳት ክፈል-ጃሽ 70 እብ
ጀህተን እግል መዐሳክር ትራክብ
ወትራክብ ወቁሽት እንዴ
ጸብጠየ ህጁማትን አተመመየ።
ለአሰክ ዐዲ-ኳለ ወክሳድ-ዕቀ
ገጽን ለጌሰየ ውሕዳት ህዩ፡ ዮም
24 ማየ፡ ምን መንደፈረ እንዴ
ትበገሰየ እብ ገበይ ዐረዘ፡ ባርንቱ
አተየ። ምስለ ዲቡ ለጸንሐየ ምን
ጀብህት ከረን ለመጽአየ ውሕዳት
እብ ሕበር አሰክ ተሰነይ እንዴ
አተላለየ ህዩ እንዴ ትፈንጠረ
አሰክ ሱዳን ገጽ ለሀርብ ለዐለ
ሐድ 80 አልፍ ጃሽ ደርግ እንዴ
ጸብጠየ ወራተን አትመመየ።

ለእብ ጀብህት ደቀምሐሬ
ለአምበተ ናይ ካቲመ ህጁም እበ
ዲብሰ ጀብህት ርቱባት ለዐለየ
4 ክፈል-ጃሽ በህለት 16፡ 52፡
70፡ 85 ምስል መክናይዝድ
ብርጌዳት 73 ወ34 ውበዕድ
ሴድየት ውሕዳት ለገብኡ።



ዛይደት መሻረክት ገቢል ለዐለ
እቱቱ። 23 ማየ አባይ እግል
አስመረ ወከረን ተረግ እንዴ
አበለ እግል ልህረብ አሰክ ተሰነይ
ክምስል አተጀህ፡ ዲብ ጀብህት
ከረን ለዐለየ ውሕዳት ጃሽ ሸዕቢ
ዲብ ባካት ሐሊብ-መንተል እንዴ
ተሐረከየ እብ ከቢን ብዙሕ ጃሽ
ወአሰለሐት አባይ ለአተርፈ እት
ህለየ፡ ሰረን አሰክ ባካት ባርንቱ
ወተሰነይ እንዴ ሐልፈየ፡ የም
አለቡ ጃሽ ወሰለሕ ጸብጠየ።
እምበል እለ ዲብ ባርንቱ ለዐለው
አንፋር ሀንደሰት ውበዕዳም
ምናድሊን አጅሀዘት እግል ለሀርብ
ለዐለ ጃሽ አባይ እግል ልጽበጦ
ወመምተለካቱ እግል ለአትርፎ
ዝያደት ትጸገመው።

ፈጅራትለ አስመረ
ለተሐረረት እቱ፡ ዲብ ዮም 27
ማየ 1991 ጃሽ ሸዕቢ ዲብ
ሐንቱ ጃሽ አባይ እግል ዐለት
ሚነት ዐሰብ እግል ልጽበጥ
ህጁም ሀረሰ። እለ መጦርለ
አዲስ አበበ እግል ሐረሮት
ገብእ ለዐለ ናይ ደንጎበ ህጁም
እግል ለአሳድር ለትከጠጠ
ዐለ። ጃሽ አባይ እብ ክለ
ሐሉቱ እግል ልትሓረብ ሰበት
ኢቀድረ ላኪን፡ ጃሽ ሸዕቢ

ዲብ ቀበት ሐቱ አምዕል ዐሰብ
ሐረረ። ዲብሰ መዲነት ለዐለ
ለበዝሕ ጃሽ አባይ ልጸበጥ እት
ህለ፡ ለተርፈ ህዩ አሰክ ጅቡቲ
ወየመን ሀርቤ። መጥ-መጦር እለ
ጃሽ ወያኔ እብ ደባባት ወሰለሕ
ክቡድ ጀብህት ሸዕብየት እንዴ
ተለ ዲብ ዮም 28 ማየ 1991
ለትጸብሕ ላለ አዲስ-አበበ እግል
ሐረሮት ህጁም ጠለቀ። እምበለ
እት ሐረት ዴዋን ሕኩመት
አዲስ አበበ እግል ደባባት
ጀብህት ሸዕብየት ለተሃደፈየን
ሸበህ መቃወመት ህዩ፡ ጃሽ
ኢያኔ መክናይዝድ ወትማንዶ
ጀብህት ሸዕብየት፡ ዲብ ጽብሕ
ምድር ናይ ዮም 28 ማየ 1991
ዓሲመት አቶብየ አዲስአበበ እብ
መቃወመት ብዝሕት እብ ተማመ
ተሐረረት።

ዲብ ኤረትርየ ለዐለ ካልኣይ
አብዮታይ ጃሽ እስትዕማር
አቶብየ፡ ዲብ እለ ናይ ደንጎበ
ወክድ፡ ብዝሐሁ ዝያድ
130.000 በጽሕ ዐለ። ዲብ
መዓርክ ጀብህት ደቀምሐሬ

እንዴ ትፈለለ እግል ልትፈንጠር
ክምስል አምበተ ህዩ፡ ምን ጃሽ
ለሐድ 80 አልፍ እት ገበይ
ከረን ወበርክ ሐድ 21 አልፍ
ዲብ ክሳድ ዕቀ፡ ሐድ 13 አልፍ
ዲብ አስመረ ወድዋራተ እብ
ጀሚዕ ዝያድ 114 አልፍ ጃሽ
አባይ ትጸበጠ። ለተርፈው ሐድ
16 አልፍ ህዩ ዲብሰ ሐርብ
ትቀተለው። ለአሲሪን ህዩ እት
ዶሉ ዐፎ እንዴ ገኣት እሎም
አሰክ ዐደም ትሳረሐው። እብ
ጀህት ሰለሕ እምበል እት ሐርብ
ለትደመረ ወሰለስ አሰክ ሱዳን
ለአተየ ደባባት ወሕዳት መካይን፡
ክሉ ሰለሕ ወመምተለካት
ካልኣይ አብዮታይ ጃሽ በህለት፡
200 ደባባት፡ 50 ናይ 130
ሚሊሜተር መዳፊዕ፡ 171 ናይ
122 ሚሊሜተር መዳፊዕ፡ 44
ቢኤም21፡ 18 ቢኤም24፡ 127
ዙ-23፡ 1038 ሞርታራት ውበዕድ
የም አለቡ ምግባይ ወክፊፍ
አሰለሐት ዲብ እዴ ጃሽ ሸዕቢ
ተሕረር ኤረትርየ በርድ። ለእግል
መደት 30 ሰነት ለገብኡ ሐርብ
ተሕረር ሸዕብ ኤረትርየ ህዩ
እብሊ ለለትዐጅብ ዐክሰድርያይ
ዐውቱ ካቲመ ገኣት እሉ።



ምን ስኮብ እግል ተሀርሶ ልግበኔ አውመ አትኣዝም ወአተልሄ ሀሌኮ

ዝብድ መቃበለት ዶክተር ዘሚኪኤል ዑቕቤ

ሓይላም ቄርአት እተ ሐልፈየ ክልኤ ጥብባት እብ ሰባት ደሐን ዐልቀት ምስል ምኡምራይ ዓፍየት አጀኒት(pediatrician) ዶክተር ዘሚኪኤል ዑቕቤ ለገብሉት ምን ተለፍዝዮን ኤረትርዮ በርናመጅ ‘ጩራ ጥዕና’ ለነሰለናህ መቃበለት ቀርአኩም። የም ሀዩ ለዝበደ እንዴ ረፍዐነ እግልኩም ቄርአት ካርያሙ ሀሌነ ቀደም በሉ።

ዶክተር ዘሚኪኤል እበ ሀበዩ ሐብሬ፡ ዐልቀት እግል ትዕቤ ወትዳብር ሰለሰ ሓጀት እግል ትርኩብ ደሩሪቱ።

- ሐፋነት
- ነዳፊት
- ሙነት

ሐፋነት

ዐልቀት ምነ ሰኒ ጣፍሐት ወእስትርሕት እቱ ትነብር ለዐለት ርሕም እመ ፍግር ዶል ትወዴ ለልትከበተ ጀው እድንዩ ሰኒ ፍንቱይቱ። እት ከብድ እት ሐፋነት ሙናስበት በህለት ክምለ ሐፋነት ገሮብ ወድ አዳም እት 370c ተሐምስ ወምኑ ትትመወን ዐለት። ምኑ ክም ፈግረት ሐፋነት ካፍየት እግል ነሀበ ብኸ። ለሐፋነት ወበራደት እንዴ መዝነ ለለአትሳኔ ክፈል ሐንገል ናይ ዐልቀት ሽቅሉ እንቡት ሰበት ኢሀሌ፡ ሐፋነትለ ዐልቀት አጊድ እግል ትከፊ ትቀድር። እሊ ሀዩ፡ እት

እንዴ ከዌት እዱሊቱ እግል ትጽነሕ ሀለ እለ ድኢኮን፡ ጅነ ክም መጽእ እዋልድ እበ እሉ ረክበት ልባሰ እግል ትከቡቱ እግል ትጀበር አለበ። ለልትዳሌ ሽለትት ጅነ ሰኒ እግል ልትረመም ሀሌት እሉ። ለለአንጠዋዋል ወለ ልትሓረጥ አግዳድ እግል ኢለሀሌ ዲቡ ሰኒ እግል ትግንሐ ሀሌት እለ። እግልሚ፡ ክእነ መሰል አግዳድ እት ሕሌለት ጅነ እንዴ ትለውለ እግል ልቀንቅነ አው ልግረግመ ቀድር። ምኑ ወኬንመ፡ እት ጭብዕት አው እግር እንዴ ትጠብለለ ለጅናህ አረይ ምስክነ እግል ሊደዮ ክም ቀድር እት ልበ እግል ትግበእ ለአትሐዜ። ቤት ሐራሱ፡ ምን በራድ ሕፍን እግል ትግበእ ምንመ ለአትሐዜ፡ ምን ተናን ናይ ዕጩይ ወፈሐም ወምን ተናን ናይ ሰጃይር ናግየት፡ ምን ክየድ ፋፊት፡ በርሀት ወሀወ ለትረክብ፡ ጸሓይ ለትአትየ ምን ገብእ ለሔሳቱ።

ነዳፊት

ሐራሱ እደየ ምንገብእ ወእብ ዓመት ገሮብ ወገሮብ ጅናህ እብ ነዳፊት እግል ትጽበዋ ደሩሪቱ። እግልሚ፡ ለዐልቀት እትለ መርሐለት እለ ምን ሕማም ለዳፊዕ እለ ሰርዐት ጥውርት ሰበት

እንዴ ኢገብኤ፡ ጀለ ሰላመትለ ናይለ እግል እንድሕር ለሀሌነ ዐልቀት ንትሓፈዝ።

ሙነት

ዐምሳት ውልድ ክም አበለት እት ቀበት ሰር-ሳዐት ጅናህ እግል ተአጥቤ ሀለ እለ። ለጥባይ እግል ጅነ ደፍአት፡ ፍንጌ እም ወውላድ ፈተ ከልቅ ሌጠ እንዴ ኢገብኤ፡ እግል ጥብመ ሐሊብ እግል ልድረር ለአትሐሰዮ። ለእም ከማን ነዚፍ እግል ልብጠር ምነ ለሰዴ ሆርሞን እግል ትንዝሕ ለአትሐሰሴ፡ እብ ዐቢሁ ሀዩ ለጅነ ክም አወላይት ክታብት ለልትዐለብ ሽቢቅ እሙ እንዴ ረክበ ከርሽቱ ወአምግይቱ ሽቅሉ ለአነብት። እለ ምን ተውሊድቱ እት ቀበት ሰር ሳዐት ለአንበተት ሙነት ጥባይ፡ አስክ ሰሰ ወሬሕ ግራሁ ለአደውር፡ እምበል ሐበት ወሱክ እግል ትተላሌ እሉ ሀሌት እለ። ምን በረ አስክ ማይመ ኢለትሐዝዮ። ላሊ ወአምዕል ምን ክልኤ አስክ ሰለሰ ሳዐት እተ ሀለ ወክድ እግል ልጥቤ ሀሌት እለ። ለሰሰ ወሬሕ ግራሁ ክም አደረየን ሀዩ፡ ላዝም ወሱክ ነብረ ለሐዜ። እብ ቅሩታዩ እብ ንኢሽ-ንኢሽ ምነ ሐምለት እተ ጸንዐት እት ልትዐዴ ነብረ ለምድ። አስክ ክልኤ ሰነት ለአደውር ሀዩ ጥቡ ጠቤ።

ሐራሱ ዲብ ተአጠቤ፡ ለሐልመት ናይለ ጥብ ዲብ አፍ ጅነ አይተት ክም ሀሌት እግል ትትኣከድ ሀሌት እለ። እለ ኢወዴት ምንገብኤ፡ ለጅነ ሀወ ብዙሕ እግል ለአቱ ወከርሸቱ ምን ጋዝ እንዴ ትመለአት ቀሩጭ(እብዐንጉር) እግል ሊዴ እቱ ክም ቀድር እግል ተአምር በ። ክል ዶል ዲብ ተአጠቤ ሰኒ እንዴ አስተረሐት እግል ትገሌ ወለጅነ ከብዱ እት ከብድ፡ ረአሱ እት ነሐረ እትንክብቱ ክም ሀሌት፡ አድሕድ ገንሐ ክም ሀለው እንዴ ትርኤ እግል ተአጥቤ ሀሌት እለ። ሐቆ ክል እጥባየተ ሀዩ፡ ጅናህ እብ ከብዱ እት ምንክበ እንዴ ሐፍደቶ ዲብ ዓጻቱ ጥብ-ጥብ ዲብ ተአብል ክም ገሌዕ እግል ቲዴ በ። እለ ለጋዝ ከደኑ እንዴ ፈግረ ምን ኡብዐንጉር ሰልሞ። ቀሌሕ ወእግል ኢለአተሰርቀመ ሰዴ። እንዴ አጥቤት ወአተግሰዐት ዲብ ተአተክርሮ ሀዩ እብ ዓጻቱ እንዴ ትመደደ ረአሱ ዲብ ምሮ ሰምጥ ክም ልትወለብ ትወዴ። እግልሚ ኩለ ነፍሱ እብ ዕንቅራር ሀሌት ምንገብኤ፡ ቀልሐ አው ጀበቡ እንዴ አቅበለ እቱ እግል ለአተሰርቀ ወሀወ እንዴ ከልአዩ እግል ልካጥር ቀድር። እብ ከብድ አተክረሮትመ ዶክተር ዘምኪኤል ኢለአይዱ። ሀወ ክም ምራዱ በደል ልስሕብ፡ ለአተ ድዋሩ ሀለ ደለ ከደን አተንፈሰዩ ሀወእ ክሰሕ እብ ሐዲስ እት ልስሕብ፡ እብ ሕዳን ሀወ ነዳፍ እግል ልትዳዩግ ክም ቀድር ለሐብር።

ሐራሱ ወመሓርሰተ ምን



ዶክተር ዘሚኪኤል ዑቕቤ

እለን ተልዩ ልትገለጥ ለዐልቀት (ወለት ዶል ገብእ)፡ እትለ ሰልፍ አምዴላት(አሳቤዕ) ክምለ ሔድ እብ ቅንተ ደም እግል ሊጊስ ምነ ቀድር። እሊ ምን እመ ለሐልፈ እተ ሆርሞን ለወደዩ ሰበት ገብኤ፡ አምዴላቱ እንዴ ዐለበ ኖሱ እግል ልብጠር ሰበት ገብኤ ለለአፈርህ ኢኮን።

ዐልቀት አንስ ትግበእ ወተብዐት አጥባዩ እግል ልትማለእ ወዐንበር ለመሰል እግል ልስጠጥ ምኑ ቀድር። እሊመ እብ ኖሱ እት ለሐድግ ለገይሱቱ። እግል ልተማተም ላኪን አለበ። እግልሚ ለጫቀጦት ወለተማታም እግል ለአርሮ ሰበት ቀድር እግል ንትሓፈዝ ሀሌት እነ። እሊ እት ልትበሀል ላኪን ክል ልብ እንዴ ከፊክ ተቀዩር ታብዖት ወለኢልትፈቱክ ቴለል ዶል ትርኤ፡ እት ቤት እንዴ ትገሌክ አተቅበሎት በሀለት ኢኮን። ሐራሱ ወመሓርሰት ዕንታቶም ወአሕሳሶም ክል ዶል ፋዜዕ ወናቄሕ እግል ልግበእ ሰኒቱ።

ሐራሱ ወመሓርሰተ እለን ተልዩ ኩሉ ረአሱ ኢለደወን!

ለሙሽ እንዴ ትበሀለ እግል ዐልቀት ለልትሀዩብ ክም ማይ ስከር፡ ከርቤ፡ ሐሳቤ፡ ቡን ፈርፈር . . . ኩለ ረአሱ እግል ልትሀዩብ ለአለቡቱ።

ዐንቀር ሸንቀቶ እንዴ ትቤ ነወኮተ።

እት ትብል ነዝዞቱ እግል ዐልቀት መደረትቲ። ሐግነት ዐልቀት ነዝናዝ ወሐረከት ትርድት ኢትትሐመል። ለረቂቅ አስራረ እት ገሌ አካናት እንዴ ትበክኤ፡ ደም እት ሐግነት እንዴ ትከዐ ገሌ ናይ ዐቅል መደረት እግል ልሕደግ ዲቡ ክም ቀድር አመሮት ለአትሐዜ። ከጅነ እግል ልፍዘዕ እነ ዶል ነሐዜ እተ ረሐቱ እብ ጭብዕትነ ዝብጥ-ዝብጥ ምን ነሐብሎ ለሐሰሴ። እግል ነሐትኣዝሞ ዶል ነሐዜመ እሶሮር ዲብ እንብል በደል ሐግነቱ እንበጭብጭ ጥብጥብ እት ነሐብል ወእንጠስስ እግል ነሐዝም ወነአስክብ እግል ንጀርብ ብኸ።

ጥብ ገዚፍ ገብኤ ምን ገብኤ፡ ጅነ እብ ጥብ እግል ኢልትዐመም እንዴ ትቤ እም ምን ጥብ እግል ተአራጦ ዲብ ትብል ሀወ እግል ልስሐብ እግል ትጠልቆ አለበ። እብ ክልኤ ጭብዕት ክምለ እት መንቀብ ቀርቀሮትመ እግል እት ጅነ እግል ልምጸእ ለዐለት እሉ ሐሊብ እንዴ ጨቅጠ ከርሶ ሰበት ሀሌ፡ እም ምን ቀርቀሮት ጥብ እግል ትትሓፈዝ ሀሌት እለ። ምንተሐት ድግፍ እንዴ አበለት ገጽ ለዐል ርፈዕ እንዴ አበለቶ እሉ እግል ተአጥብዮ እግል ትባሰር በ። ጥብ እግል ጅነ ኢለዐምጥ ክምለ ስፖንጅ ሰበት ገብኤ ሀወ ኢከልኤ። እግል ጅነ ጼነ እሙ እግል ለአምር ወእብ ደፍአት ክም ልሸዕር ወዴ።




ሞት ሻፍገት እግል ለአብጽሐ አው መደረት ዐባይ እት ዓፍየት ዐነድር ሀወ ለመሰል ከፈፍል ገሮብ እግል ልሰብብ ሰበት ቀድር፡ በራድ እግል ትንሰእ በክት እግል ነሀብ አለብኸ። ሰበት እሊ፡ ለእቱ ንትከበተ ልባሰ ሓምል፡ ዝፋፍ ወሐፋነት ለለሀይብ እግል ልግበእበ። ምን ግጥን ለትዳለ ሽለትት ምንገብኤ ሀዩ ለሔሳቱ። ግጥን ሐፋነት ለሀይብ ወእግል ገሮብመ ዳፍእቱ።

ለእቡ ንትከበተ ሽልቱት ጅነ እንዴ አትዛፈፍነ እቡ እግል ንቀይሮ ከብዕድ ሽልቱት ጽፋይ፡ ሓምል ወሐፋነት ለለሀይብ እግል ነሐትላብስ ወጅብ። እበ እሉ ትከበትነ ሐቆ አልበስናህ በራድ እግል ልስሐብ እተ ክም ቀድር እግል ንትረሰዕ አለብኸ። እም አውረሐተ እንዴ ኢተምም በዴረ ለጅነ ትከበት እቡ ሽለትት ግሩም እንዴ ሐጽበት፡ ምን ገብእ እላመ

ኢትሀ'ሌ፡ ለገብኤ ሕማም ለሰብብ ጀራሲም ሀዩ እግል ልመርደ ቀድር። ዝያደት ሀዩ፡ እት ነዳፊት እደይ ለሀለ እለ ሕሰር እግል ሊዚድ ቡ። ሽልቱት ጅናህ ክም ቀየረት፡ እዴህ እት ጥብ እንዴ ኢትከፊ እብ ማይ ወሳቡን እግል ትሕጸበ ሀሌት እለ። ሐቆ ሽቃቅ አየ ሓጀት እንዴ ኢትጽብጥ ላዝም እደየ እግል ትሕጸብ ሀሌት እለ። ጅነ እግል ተአጥቤ ጥብ እግል ተአፍግር ዶል ትብል እዴህ ጽራት(እብ ማይ ወሳቡን ሕጽብት ክም ሀሌት) እግል ተአክድ በ። ለገብኤ ሐራሱ እግል ልድሐር ወልጋኔሕ ለመጽእ አዳም ሀዩ፡ እግል ጅነ ምን ገብእ ወእግል ሐራሱ ምን ኢተማትም ለሐሳቱ። እዴነ ለእለ ይእንጽብጥ እበ ርስሐት ሰበት አለብኸ፡ ወጅነ እለ ርስሐት እለ ሰበት ኢልትሐመል፡ ሕቅፈት ወሳዐሞት እንዴ አቤነ





አሳር

መት-አማር ምስል ቅዱም አሳር ቆሓይቶ

ሓይሳም ወሓይሳት ቁርኦት ጀሪደት ኤረትርየ ሐዳስ እተ ለሐልፈ ጥብዓት ጀሪደት ኤረትርየ ሐዳስ እት ዓሙድ አሳር እብ ክሱስ እት ምፍጋር ጸሓይ ዐድነ ለህለ ከበሳታት እቲ እንዴ ትወቀልነ እት አቅሊም ግብለት ለህለ አሳር ቆሓይቶ ምስሉ ለልኦትኣምር ክቲብ 1ይ ክፈሉ ቅዱማም እግልኩም ክም ዐልነ ለልትአመር ቲ። አዜ ህዩ 2ይ ወናይ ደንጎበ ክፈሉ እንቀድም እግልኩም ከቅራኦት በኪተት።

ምን ጽበጥ ዕሉም አሳር ቅዱም እሊ ክፋል ምፍጋር ጸሓይ ኦጸድፍ ኤረትርየ እንዴ ይእንፈግር እብ ትምሳላት ወአሰር ዐባዩ ኦብያት ኦዳም በዲር ለወክል ክፈል ውርስ ሰዋልፍ ቆሓይቶ ምን ኣክር ምራፍ 19 ክፈል ዘበን እንዴ ኦንበተ እንትባህ ለትፈናተው መትመራምረት ለሰሐባቲ። ለበዝሐ ክፋላት ቅዱም አሳር ቆሓይቶ፡ እተ እብ ደዋይሕ ሰፈረ ለትትአመር ሸክል እዳረት ለጸብጠ ክፈል ብእቲ። እብ ሸርም ሰፈራ ለልትአመር 67 ምትር ሰምጥ ለቡ ወእት ምግባይ ክፈሉ ናይ 3 ምትር ሪም ለልትዋገም ናይ በዲር ከዛን ክምስልሁመ እት ድዋራት ሰፈረ እብ ብዝሒ ለልትረኩብ አሳር ትምሳላት፡ አሳር ዐባዩ ኦብያት ሱብ በዲር ወእብ ዐቢሁ ናይ ለሐልፈ 2 ክፈል ዘበናት እብ ለትፈናተው መትመራምረት ለትወሰቃቲ።

እት ረአሰ እሊ እብ መቅበረት ምስርዩን ለልትአመር አሳር ቅዱም አቅብር ወመሻቀዩታት ምነ ኣካን ለፈረ ግዛዝ (glass artefacts) ወእግሉ እግል አፍረዮት ልትነፍዖ እቡ ለዐለው እበን እቶናት(መቅሎታት) ገሌ ምነ እግል ልስሐቡከ ለቀድሮ ቅዱም አሳር ቆሓይቶ ክም ቶም ልትሸርሖ።

ሸዌይንፈርዝ ለትበህለ መትመራምራይ አሳር ቅዱም

ምን ጀርመን እት ሰነት 1894 ሐድ 70 ለጉብኦ ሀይከላት ለእብ መቅበረት ምስርዩን ለልትአመር አቅብር ክም ረክበ ወእግል 32 ምነ ሀዩክል ኣስክ በርሊን ክም ጌስ እቦም ለትፈናተ ወሳይቅ ለሐብር። እበ ኣስክ እለ እትሊ ኢያም ቅሩብ ለትሸረሐ ህዩ ለ29 ሀይከል ምነ ህቲ ለረክበዮም እኩባም ክም ህለው እት ልትወደሕ፡ እሊ እስባታት እሊ ኣግደ እግለ እት 1ይ ክፈል ዘበን ቀደም ወግረ መትወላድ ነብይላህ ዒሰ እትሊ ድዋራት እሊ ለበርኩተ ምጅተመዕ፡ ደረጀት ዐቦቱ ወሐዳራቱ ለሸርሕ ቲ።



ናይ ኣብዓት ሰወር

ቆሓይቶ

ብዝሒ ወሸፋቀት ለእት ቆሓይቶ ለትወስቀ ኣካናት አሳር በዲር እት ጌማም እንዴ ኣቲነ ኣካናት አሳር በዲር ቆሓይቶ

ዎሮት ምነ ዐባዩ ሰልጠናት ክም ዐለ ፍሂም ምህም ቲ።

እት እስትራቲጅያይ ከጥ ምን ከበሳታት ኤረትርየ ወምንኬኑ ኣስክ ምእታይ ዙለ ለትመደደ ሰልጠናት እሱስ ሰበት ዐለ ህዩ፡ ናይ በዲር አሳር ቆሓይቶ ምነ እት ኣግዳም በሐር ቀየሕ እብ ቅድምት ሚነት ኣዱሊስ ምስለ እት ኩብድ ምድር ከበሰ ለኣትዳብጥ ለዐለ ወራታት ትጃረት ለክሰበ ወለ ኣርሐበ ምግብ ሰልጠናት ቲ።

እብ ኣብርሃም ዘርኣይ



አሳር ሰከን ወከዛን

ማይ ቆሓይቶ

ቅዱም አሳር ቆሓይቶ እብ ገሌ ኬትበት ምስል ቅዱማም መትመራምረት ወተሸሸ እብ ቀሌዌ ለትትአመር ናይ ተጃረት ሐረት ክም ዐለ ፕቶሎሚ (Ptolemy) ለትበህለ ምን ኣለክሰንደርየ ለመጽ ናይለ ወክድ ለሀይ መትመራምራይ ጆኦግራፍ እግል ቀሌዌ ለናይ ሰልፍ እት ከጥ ኣዱሊስ ወከበሰ ኤረትርየ ለትትረኩብ መዲነት አው ሐረት ተጃረት እንዴ ቤለ ሳምየ ዐለ።

ምስል እሊ ለልትመሳሰል ለእብ ፔሪፕራስ ኦፍ ኢሪትርያን ሲ ለልትአመር ናይ 1ይ ክፈል ዘበን ግረ መትወላድ ነብዩላሂ ዒሰ ዐለይሂ ወሰላም መርጀዕ አትፋዝያት ተጃረት እግል ቀሌዌ ሐቆ ሰለስ ኣምዕል ምን ኣዱሊስ እብ ቃፍላይ ከጥ ሐዳስ ወኮማይል ለትትበጸሕ መዲነት እንዴ ቤለ ውሱቀ ህለ። እሉም መርጀዓት እሉም እብ ወለት ገበይ እንዴ ሐደግናሆም፡ ምንኬን እሊ ቅዱም ክቲብ ለልሀይቡ መርበይ ለእንዴ ተኣከረው እት ወክድ ሕርየት እብ ሐሽም መትመራምረት አሳር ጀርመን እት ኤረትርየ ወእት ወጠንያይ መትሓፍ ኤረትርየ ለጉብኦ ብሐሳት ቆሓይቶ ተጃረት ወእዳረት ለትኩትር ሐዳረት ዐባይ ክም ዐለት እግለ ሸርሖ።

ዲብ ገጽ 10 ልተላሌ.....



ሕላይ ሱብ በዲር

ምን ሐልዩት ዐድ ህብቴስ አሚር ወድ ገበህ እግል ከንቲባይ ጃውጅ ለሐለዩ ሕላየት ዲብለ ሐልፈ ጥብዐት ጀሪደት ኤረትርየ ሐዳስ ዕልብ 36 ኣወላይ ክፋለ ሳምዓም ዐልነ ዮም ካልኣይ ወናይ ደንጎበ ክፈለ እግል ንርኤ ቲ፡-

ቅሬሽ መምበ ዖፍ አርግሁ እት ለሃሚቱ ኣሽንገለ ኣብሁ ወወልደት ወላዲቱ ሰለሰ ሰድር ፋግር ብሕጽ ኣረጊቱ ምእት ልትዐንደቆም እት ለሸናኪቱ ወምእት ልትባሸርም ኢለኣተሙመ ፊቲ።

ቅሬሽ መምበ ዖፍ አርግሁ ሰድር ጅር ምን ልቡሎ ነጅር ትዘበሕ ምን ልቡሎ ቀትል ለድሩይ አርገ ወዴ ወጽፍር ለድሩይ እት መሻጥቁ ሸለሸል ልትሐዶሩ ክምሰል ምድር ወልሸፎሉ ክምሰል ደብር።

ቅሬሽ መምበ ዖፍ አርግሁ እት ሰናይን መምባዩ ጽኑዕ ዳቅብ መምባዩ ጽኑዕ ሓይል ሆይ ቲ እት መራክብ ወጅላብ ቲ እት ገዛይር ኣግሐጽ ቲ እት ሐዮታት ክብት ሰጋድ ጨርም እት ኣሸካራት በልዖም ግኔ ወጨለጭም ግት ውሕጠቱ ተ ኢልትሐነቅ ወኢሐትም ሸሕ ብልዐቱ ተ ግዴት ሐንጽጽ ምን ዐጽም ምን ከቦ እት ግኔ ነክሰ ቤተ ወቀድም ዐለሌታት ሳብር ኣስክ ኣርበዐት ቀለጭም።

ብት ሰረቱ ተ ረምበ ወዴ ወሀድም ዝዩሕ እት ከወኒ እት ኣፍ ዕምር ደልም ክልኤ ኣገልድ ሓምለት ሚ በን ወትክም ለለዓለን እርርጊ ቲ ወለተሓተን ጸመጽም ኣደወድገ ወዴ ወኢትዘበነት ተርም ሸርኩት መዐሪፈት ምነ መጽኦት ዐልም ኣረይ ወማሞታት ምን ክል ኣካን ሐርም።

ቅሬሽ መምበ ዖፍ አርግሁ ቀልዕ እግል፡ ፈታይ ደረት ጸርዕ እግል ኣባይ ሕመት ከልዕ ሃይፍ ገበይ ካልእ ወሸርዕ ኣሸሩም ተሃገ እቱ ቀወርዕ እግል ሐ ጽላም ገኣከ ወእግል እንሰ ጸልዕ

አሚር ወድ ገበህ እግል ከንቲባይ ጃውጅ እለ ክምስል ሐለዩ ከንቲባ ጃውጅ ቤሎ “እዴክ ምደድ ከ ምን ለእት ግራክ ለህለ መንሸጥ ጭቀም” ወህቱ ኣርበዐ ርያል ምስል ጨቅመ። ሐር እት ልገይሶ ዎሮ ርያል ክምስል ወድቀ ምኖም፡ አሚር እግል ከንቲባይ ጃውጅ ቤሎ፡ “ዎሮ ርያል ወድቀ ምንእነ” ህቱ ህዩ በልሰ እቲ። ወቤለ “ሐደጎ ዎሮመ ዎሮ ብዕድ ለኣፈርሕ”



ጊዜያዊ ጥያቄ

ሕዳግ ሰሌዳ



መጃክ በገጅ ክኩ ሰነድም ባፍየት ከከምክም መጃክ ቱ

የም እት ሰፍሐት ሽባን ምስል ክል መሻክል ዓፍየቱ አሰር ሰልም እት ልሀረክርክ ምን ቀላቅሎታት ምዴርየት አስማዋ እንዴት ብገሰ፡ ሳወ እት ለሓገ ወእት ኩልየት ዓፍየት አስመረ እንዴት ተሳብረ ደረጃቱ ምን ዲፕሎም እት ዲግሪ ለወቀለ ሻብ መሕሙድ ሳልሕ ቱ። እሊ መዐጸም ወክሀላት እንዴ ደረጃት እሊ እግል ለሓለፊዩ ቱልል እት ጌማም አቲነ አዜ እት 3ይት መጃል በንርጅ እት እንቱ ምን ኩብድ እንዴ አፍገርነ መቃበለት እለ ዋድያም እግልሚ ተጃርቡ ወክድ ሰበት ኢጉብኣቱ። ከቅራኣት ሰኪተት እት ንተምኔ እግልኩም እት ታምም ጽብጥለ መቃበለትን እግል ንዐዴኩም።



ሻብ እሊ ሰብር ወደ እትለ ልብጸሕ ሰዱድ እንዴ ሰነት ፈ ሰ ል እ ሰ ምኑ ህሌነ ለ ል ት ጸ በ ር

ሰኣል፡አሰል ምስል ርሕክ ምን ተኣትኣምረን?

እበ ተሀየቤኒ በክት እት ሐምድ፡ አነ መሕሙድ ሳልሕ ኣድም እትበሀል መኣንበት ትሰዒናት እት ምዴርየት አስማዋ ወእብ ፍንቱይ እት ጃኒ ትወልድኩ ወዐቤኩ። ሰምርዬ ክም ተመ ህዩ እት መድረሰት ጠወን ሰነት 2001/2002 ናይ መኣንብተይት ድራሰቹ ኣንበትኩ።

ሰኣል፡ እት ድራሰት ከፎ ዐልክ?

ኣማን ተሐይሰ እት መኣንብተይት ደረጃት እት እደርሰ በሀለት እት ጠወን ምነ ጃእዘት ነስኦ ለዐለው ደረሰ ዐልኩ፡ እት ምግብይት ወክልኣት ደረጃትመ ጃእዘት እነስኦ ዐልኩ ምናተ ኣነ ለኣምን እቡ ንስኣት ጃእዘት እንዴ ኢጉብእ ኣክልኣዩ ዕልም ጽብጥ ህሌክ ሰበት ጉብኣ ነፍሼ እት ምግባዩም ደረሰ ዐለት እግል ኢበለክ እቀድር።

ሰኣል፡ መድረሰት ንእሽ ከፎ ትትዘከረ?

ወላሂ ለገበይ ምን ዐድነ አሰክ መድረሰትነ ለዐለ ሰኒ ወኣማን ተኣትዕበኒ ዐለት። እግልሚ ሰምርዬ እት ወክድ ለሀይ 6 ሰነት ወ5 ወርሕ ባጽሕ ሰበት ዐላቱ። እለ ገበይ እለ ክእነ የም ትዘከረኒ እት ዕጩይ ምን ጸሓይ እት ዓርፍ እብለ ህዩ ጽምእ ወሰፍረ ክሉ ምስል ዘብጥ እቹ ሰበት ዐለ መረ እትዕብ ዐልኩ። እሊ እት ሳልፋያም ለናይ መኣንብተይት ደረጃት ድራሰቹ ዐለ። ሐር ላኪን ሰምርዬ እት ልዐቤ ሰበት መጸ ለገበይ እግል እልመደ ቀደርኩ። መድረሰትነ እግል ንዐሬ ላሊ ሰበት ንትለበስ ዐልኩ፡ እብሊ ህዩ ነብረ እንዴ ይእበልዕ ሄርር ኣጸብሕ ወሐቀ ዝያድ 2 ሳዐትት ሄራር መድረሰቹ እበጽሕ ዐልኩ። ምስለ ንእሼመ ሽወዩ ደየግ ነፍሰ

እወዴ ሰበት ዐልኩ እሊመ እት መድረሰቹ ተኣሲር ወዴ እቹ ዐለ።

ሰኣል፡ ለሕማም ሚ ቱ?

ወላሂ ለሕማም እሊቱ እግል ኢበለክ ይእቀድር። እብ ሰብብ ቅባር፡ ብርድ ወብዕድ መጸኒ። ነፍሼ ትዳየግ ወእብ ሐለት ኣተንፍሱ። እሊ ህዩ እት መድረሰት ዝያድ እግል ኣድምዕ ተኣሲር ወዴ እቹ ዐለ። እግልሚ እብ ለምቡት ወብዕድ መሻቀዶታት እግል ይእትነፈሶ ለምኑ ፈግር ተናን ህጣሽ ወመዳየገት ወዴ እቹ ሰበት ዐላቱ። እት ቦርዲን ክም ተዐዴኩ ላኪን ሽወዩ ደሐን ዐልኩ እግልሚ እብ ከሀረበት ሐፍዝ ወእት ኣብያት ነዲፍ ኣቱ ሰበት ዐልኩ። ዶል-ዶል ላኪን መጸኒ ሰበት ዐለ ኣሰክ ለትፈናተ መራክዝ ዓፍየት እንዴ ጊሰኩ መርመራታት ምንመ ወዴኩ ሐበት ኣለብክ ልብሉኒ ወዐቀብል ዐልኩ።

ሰኣል፡ እት ሓለት ሳወ ምን ንትዐዴ?

ወላሂ ሳወ ክም መጸኩ ለደየግዬ እበ እቱ ለህለ ቅባር ክምሰልሁመ እት ሳወ ክታን ኣቲ ሰበት ዐለ እሊመ ሰበት ነክሼኒ ሐሳስየት ሰበት ሀረሰ እቹ ለሕማምዬ ኣደቀበዬ። እብሊ ህዩ እብ ትሉሉይ ኣሰክ ሕክምን እትረፈዕ ዐልኩ። ምስል እሊ ክሉ ህዩ እምትሓን ማትሪክ ሻረ'ኮ ወሐለፍኩ ኣልሐምድልላህ ምስለ ዐልኩ እት ሓለት ወ1.8 እንዴ ኣምጸኩ ኩልየት ሐለፍኩ።

ሰኣል፡ እግል ሚ መጃል ዓፍየት ሐፊክ?

ለሰብ ለእቡ መጃል ሐፊኩ እቡ መምክን ምስለ ናይ ዓፍየትቹ ለትጃባዋ እግል ልግበእ ቀድር። ኣሰልፍ ኣነ 1.8 እምጽእ ሰበት ዐልኩ ምስለ መጃል ነርሲን ለሐረው ደረሰ እንዴ ተሐፊኩ ኣስመረ መጸኩ ወሰነት ሐቱ እብ

ሻብ መሕሙድ ሳልሕ ምን ኩልየት ዓፍየት አስመረ

ሕበር ክም ደረሰኩ መጃል ነርሲን ኣውለዶት ሐፊኩ ወድራሰቹ ኣንበትኩ።

ሰኣል፡ እት ኩልየት ከፎ ጊሰክ?

እት ናይ ሰለሰ ሰነት ድራሰት ሰኒ ሰበት ከደምኩ ንቃዋ ሰኒ ኣምጸኩ። ጀምሶ ንቃጩ ህዩ 3.40 ዐለ፡ ግራሁ ንቃዋ ምን 3 ወለዐል ለብኩም እብ ደረጃት ዲግሪ ድራሰትኩም እግል ተኣተላልወ ትቀድሮ ሰበት ትበሀልኩ፡ እግል ኣተላሌ ወረቀት ቀደምኩ ወትዐወትኩ። እብሊ ህዩ እባዬ ድራሰት ዲግሪ እብ መጃል በንጅ እት ኣቲኩ ወእት ኣተላሌ ህሌኩ።

ሰኣል፡መጃል በንጅ ሚ ቱ?

መጃል በንጅ መጃል ሰኒ ወኣማን ትራድ ቱ፡ ኣርወሐትለ ዐመልየት ወዴ ለህለ ሕሙም እት እዴክ እት ሐንቱ ረቢ፡ እግልሚ እሊ መጃል እሊ ኣምር ፋይሕ ለልሐዜ ሰበት ጉብኣ ለነፈር ለእትሊ መጃል እሊ ለኣቱ ብዞሕ

ሰበት እሊ እሊ መጃል እሊ ኣብ ናይ ክሉ መጃላት ዓፍየት ቱ እብል ክሉ ምኑ ሰበት ፈግር ወክሉ እቱ ሰበት ልትደረሰ።

ሰኣል፡ ለኩብደት ለሐዘት እሊ መጃል ሚ ቱ?

ወላሂ ለበነጅት ናይ ገሌ ክፈል ገርብ ህለ ወናይ ክሉ ገርብመ ህለ እግል ቄድራይ ክልኤ መርሐለት ህለየ ሰኒ ወኣማን ትራዳት። ለናይ ሰልፍ መዳላይ ወክድ ቱ እትሊ ህዩ ለበዐል መቅደረት ክሉ ብሐሳቱ እንዴ ኣትመመ መሻቀዶታት እንዴ ኣትዳለ እግል ዝብጠትለ በንጅ ጉብኣ። ለካልኣይ ወክድ ህዩ ግራለ ዐመልየት ለህለ ወክድ እት ሓሉቱ ለጠቢዐት እግል ትብለሱቱ። እት መርሐለትለ ሰልፍ ለነፈር ገሌ ክፈል ገርቡ ልግበእ ወክሉ ገርቡ እግል ክሉ መዳላይ እግል ቲዴ ህለ እግልኩ። እግልሚ እት ምግብ ለኢትጸበርኩሁ ሓላት እግል ልሳድፍ ሰበት ቀድር ቱ። ለነፈር እግልሚ በንጅ ዶል ልትህየብ ገርብለ ነፈር ምነ



ደርሰ ሰርዐት ነርሻ እብ ዐቢሁ መባትክ ገርብ ወድ ኣዳም ሽቅሎም ወሐረኩቶም ሰርዐት ኣተንፈሶት ደም ወሰርዐት ሽን ገሌ ምነ እብ ዝያድ እግል ተኣምሮ ለወጅበክ ቱ፡ ክምሰልሁመ ሰራይ ወመሻክሉ ሕማማት ወኣድወየቱ እሊ ክሉ እግል ተኣምር ትትቀሰብ።

ሽክሉ እንዴ በጥረ ለሐኪም ክም ሐዘ እግል ልሽረም ወልሽፈዋ በክት ረክብ። ለሐኪም ህዩ ክም ኣትመመ እት ሓለቱ ለቀዲመት እግል ትብለሱ ወእብ ገበይ ጠቢዐት እግል ለኣተንፍሰ ለልሀርሱ ደወ እብ መደጋግ ተህደቡ። እሊ ወክድ እሊ ህዩ

ለትደቀባቱ፡ እግልሚ ለበክት ለእቱ እግል ተሀርሱ ትቀድር እት ኩብድ 6 ደቂቀት ሰበት ጉብኣ እሊ ደወ እሊ እብ ለጉብኣት ምሽክለት ኢሀረሰዩ ምንጉብእ ኣዜመ እብ ሽፋግ ኣርወሐቱ እት ትትባደር ኣው ምን ሐዲሰ ትብንጁ ኣውመ ህዩ እብ ሽፋግ እግል ለኣተንፍሰ ለሰድዩ ብዕድ በሰር ትባሰር ምን እሊ ወክድ እሊ ኣደግክ ምንጉብኣ ለነፈር ምን እዴክ ገይሰ።

ሰኣል፡ንቃዋክ እትሊ መጃል እሊ ከፎ ህለ?

ወላሂ እብ ለትፈናተ ኣሰባብ ንቅጠቹ ሰኒ ወኣማን ውቁለ ምንመ ይህሌኩ ኣልሐምድልላህ ሰኒ ህሌት ኣዜ ሳልሳይት ሰነት እደርሰ ህሌኩ፡ እንሻለህ ለህሌት እግልዬ ሰነት እብ ሽደት እንዴ ጸባዋኩወ ንቃጩ እወቅል እጉብኤ።

ሰኣል፡ እንተ ሻብ እንተ ሽባን እግልሚ እት ተዐሊሞም ቀደም ልሄር ይህለው መሰለክ?

እብ ፍንቱይ ለእት ብሩር ለህለው ሽባን እትለ ደረጃት እለ ለኢበጽኩው እቡ ኣሰባብ ብዞሕ ምንማቱ ገሌ ምኑ ላኪን ኢትመትኣያሱ መሻክል እጅትማዕየት፡ እቅትሳድ ውብዕድ መንፈዐት ተዐሊም ኢፍሂም ቱ እብል። እግልሚ ለሽባንለ ብሩር ኣጊድ ለህዱ ወሐር እት ሐያት እጅትማዕየት ልሽመሞ። ሐያትለ ብሩር ህዩ ምን እዴ እት ኣፍ ሰበት ጉብኣት፡ ውላድ ወመስኡልየት ሰበት ረፍዕ። ገሌሆመ መድረሰት ሚ ነፍዐተክ ወእንተ ሚ ረከብክ ምነ ለልብል ፈሀም እንዴ ጸብጠው እት ሽቅል ነሐር ልትፈረር። ገሌ ምነ ልትርኤ ቱ። ምናተ ድራሰት መፍትሕ ነበር ሰበት ጉብኣት፡ ሽባን ህዩ እብ ፍንቱይ ለዐበ ዶር ሽቡቶም እት ተዐሊም ዶል ልሓሉፈ ፈጅር እበ ምስዳሮም ልትረይሐ። ሰበት እሊ ምስል ክል መሻክሎም ወመሓግዞም እግል ልድረሶ ወደረጃት እግል ልብጽሐ ቦም እብል።

እት ደንገበ ለትብለ ከሊመት ምን ተህሌ?

እብ ፍንቱይ እግል ሽባን ዕልም ኣሳስ ክሉ ሰበት ጉብኣ ድራሰትኩም እንዴ ወለት ገበይ ኢትነስኦ ምነ ኣትመመ የም ለትክዱመ ፈጅር እግል ትረይሐክም ቱ ኣምዕል ኣለበ ይህሌት እብሎም። እብ ፍንቱይ ህዩ እግል ዓይሰቹ ፈተቹ ወመልህያምዬ እለ ደረጃት እለ እግል እብጸሕ ለሰደውኒ ወሰዱኒ ለህለው ሐምድ እንሻለ ፍሬ ተዐበትኩም እብ ድራሰት ወእቅትሳድ እፈዴኩም ቱ እብሎም።

ሰፍሐት ሽባን ነሐምደክ ሻብ መሕሙድ ወእንሻለ ግረ ኣላመ እግል ንትዋጀህ ምስልክ ሰኣየት ብኹ።



ልብብ ጀዛ ካይን

ሐቲ ሰኔ ትርድት ላተ መምለከት ዐለት፡ ለመምለከት ዎሮት ሰኔ ዓድል ላቲ መልክ ለሐክመ ነበረ። ሮሻንለ መልክ ክሎም ሰካንለ መምለከት ሾረቶም ትግበእ መረእዮም እግል ለሀቦ መንግሥቱ ካሰት ዐለ። ለመልክ እግል ክሎም ለአተንሴ ወለእሉ ለሀዩቡ አረእ ልግበእ መሾረት ልትከበት ወልትነፊዕ እቡ ዐለ። ወእብሊ ውዳዩ ህቲ፡ መሰል ሰኔት እግል ሰብ ፍቲሕ ወዐድል ላቶም ሚርሐት ጋብእ ነብረ።

ዒድ ተውሊደቱ እትለ ገብእ እቱ ወቅት፡ ሰብለ መምለከት ለቀለ ሓጃቶም ለአትሄድዎ ነበረው። ከዎሮት ምነ ሐረሰቶት ለነኣይሽ ህቲመ እብ ተረቱ እግለ መልክ ሀድዩት እግል ለሀብ ሐዘ፡ ወእግለ መልክ ሰፊራይ ጸብዋ እት እንቱ እንዴ መጽእዩ ክምእነ ቤለዩ፡ “ሕሹም መልክ፡ አነ እለ ሀድዩት ሐምቀት እለ እምጽእ እግልከ ህሌኮ፡ ከኢትቅበቤ ህተ ለቀሌት አነ ለእመልክ ሰንዐት ተ” ቤለዮ ወለሰፊራይ ሀበዩ።

ለመልክ ህዩ፡ “እሊ እሉ ሃይብዬ ህሌከ ሰፊራይ ፍንቲት ጠቢዐት ሚ ቡ?” እት ልብል

ትሰአለዩ።

ለሐረሰታይ ህዩ፡ “እሊ ሰፊራይ እሊ ሰኔ ዐጂብ ሰፊራይ ቱ፡ ወእለ ተአትፈክር ላተ ጠቢዐቱ አነ እት ንዕዮ እትነ’ፊዕ እበ ህሌኮ። በህለት ሽረክ እንዴ አዳሌኮ፡ እሊ ሰፊራይ እትለ ባክለ ሽረክ እከርዩ። ህቲ ህዩ፡ እት ለሐሌ ለአነብት ወእግለ እሉ ለመሰሎ ሐዉ ልትላከዮም። ከዶል ክርንቱ እንዴ ሰምዐው ዲቡ መጽተ፡ እትለ ሽረክዬ ልትካረው ወአነ እጽብጦም” ቤለዩ።

ለመልክ እለ ክም ሰምዐ፡ እግለ ሰፊራይ ነስአዩ ወሰኪን እበ ስጋዱ እንዴ ገርቦ ለክፈዩ። ለሐረሰታይ፡ “ሕሹም መልክ፡ እለ ሚተ እለ ወዴክ፡ ለሰፊራይ አፎ ቀተልካሁ?” ቤለዩ።

ለመልክ ህዩ፡ “ለገብአ ልግበእ፡ እግል ውላድ ጅንሱ (ዐዱ) ለከይን ናይ አማን ካይን ቱ። ወእምበል ቀቲል ብዕደት ሐቲመ ኢተአስትህሉ” ቤለዩ።

ከኪያነት፡ ወሐር ህዩ ከያነት ዐድከ ወአዳምከ ለእክያመ አለቡ፡ ወጀዘ ከያነት እምበል እለ ሚ ተአስትህሉ።

ተበሰም

ዎሮት ምን ቅያስ ወለዐል ለለሐርቅ ነፈር ዐለ። ሐር ለነፈር አልሓዩ ምን አምጸጸዩ፡ አስክ ሐኪም እንዴ ንሴ፡ እግለ ሐኪም፡ “ስምዓኒ ደክቶር፡ ክሉ ለአንድብዬ ናቅሉ፡ ምናተ እሊ ለአመጸ’ኒ ለሀለ አልሓይ ሐቲመ ኢቲበሉ” ቤለዩ።

በሀል እመራም

- “ምስል ንግበእ፡ እሊ ለሰልፍና ቱ። ምስል እት ሕነ አተላሌነ ምን ገብእ ህዩ፡ እሊ ተቀድም ቱ። ወሽቂ ምስል ሕድ ህዩ ዐውቲ ቱ።” (ኤንጋ ፎርድ)
- “እክላስ ለአለቡ እቱ ዐመል፡ ከመ ነፈር ለሳፍር ወለመስወዱ ምን ሐጸ እንዴ መልአዩ ለለአሴርር እቡ ቱ። ከህቲ ጸሩ አክበደ እት ኢኮን፡ ሐቲመ መንፈዐት አለቡ።” (እብን አልቅዩም)
- “ሰሓቅ ለትሓወሌክ ትትረስዑ ትገብእ፡ ምናተ ብካይ ለትሓወሌክ ላቱ ኢልትረስዕ” (ዐምሩ ኻልድ)

ለተአትፈክር አማን እብ ክሱስ

ሰላዲ

- 1- አስክ ወቅት 2ይ ሐርብ እዲኑ ዲብ ሳይቤርዮ ቀጠፍ ሻሂ ክም ሰላዲ ልትነፍዖ እቡ ነብረው።
- 2- ለናይ ደንጎበ ዘዖታት ፊናን ቦብ ማርሊ ቀዴመይ ሞቱ፡ “ማል ሐዮት እግል ልትዛቤ ኢቀድር” ልብለ ዐለዩ።
- 3- ድራሰት ክምለ ሽርሐቱ፡ እት ፍንጌ እሲት ወእናስ እብ ሰብብ ሰላዲ ለልትከለቅ ዞዕ፡ ሰልፋይ ሐብሬ ናይለ እግል ልትሓደጎ ለሀለ እሎም ጸብሬ ቱ።
- 4- ድራሰት ክምለ ሽርሐቱ፡ ለውቀት፡ ማልከ ሕኔት ዲብ ምልክ ለተአውዕለን ሓጃት እንዴ ትዛቤክ እቡ እተን ተአከልሱ፡ እት ተጃርብ ሐዲስ ምን ትትፈረር እቡ ትረክበ።
- 5- ድራሳት ክምለ አከደያሁ፡ 2 ምን ክል 3 ዓይለት ማል ምን አብዕቦታተን ለወርሰዩ፡ እብ ሰብብለ አግማም ለሐዲስ ክሉ ማለን ክም ልሰእነ ተአመረ።

አምሳላት እንግሊዝ ወመዓኒሁ

A bad excuse is better than none.

እዕትዛር እኩይመ ምንገብእ ምን በሕ ልትፈደል።

A calm sea does not make a skilled sailor.

በሐር ሃድአት ፋርስ ቀዋሴናይ ኢተአፈሬ።

A bad tree does not yield good apples.

ዕጨት እኪት ፍሬ ፋሪ (ሰኔ) ኢትታኬ ምኑ።

A bad workman blames his tools.

ሐምቅ ሽቃላይ አላት ሽቅሉ ለሐሚ እልከ።

A barking dog seldom bites.

ከልብ ኔብሓይ ንክሸቱ ሐት-ሐቲ ዶል ተ።

A book holds a house of gold.

ክታብ ቤት ደሀብ ረፈዕ።

A broken friendship may be soldered but will never be sound.

ምስንዮት ሐንኪሸት ትትለሐም እድኢኮን፡ ኢትሰኔ።

A burden of one’s own choice is not felt.

እዴ ኖስ ብርድት ቅርት ተ (ጸር ለኖስከ ሓሪሁ፡ ኢከብድ እትከ)።

A burnt child dreads the fire.

ለነደ ጅነ ምን እሳት በሀርር።

ምን ሐቃይቅ ዕልም

- 1 - እት ሐቲ ጭብዕትክ ሾከት ዶል ትትሸረብ፡ ለአካን ለሾከት አቴት እበ ሽሪዋ ለጠእ በህለት ለሰገት እንዴ አሰርከ እተ፡ ለለሰገት ሻፍግ እት እንተ እተ ዶለ ንዝዐ። ለዶል ለሀ እለ ሾከት እለ እምበል አዘ ወመጢጠት እግል ትትመልሀሽ ምንካ ቱ።
- 2 - እብ ትሉሉይ ማይ ዶል ትሰቴ መጺጸት ረአስ ክም ትትሸበህ ምንክ ትገብእ።
- 3 - ስታይ ቡን ተአበዜሕ ገብእክ ምን ገብእ፡ ረአይ ናይ ብዕዳም እብ ብዞሕ ክም ትትከበት ትገብእ።
- 4 - አጀኒት ለነኣይሹ፡ እት ዘመን ንእሾም ብዞሕ እት ልትሐቀፎ ነብሮ ዐለው ምን ገብእ፡ ክም ዐበው ዝዶድ ክሉም ልዉቃም እት እንቶም ልትረአው።
- 5 - እግለ ብዕዳም ካልኣይ በክት ኢትክልአም፡ ምናተ እግል ሳልስ ዶል ላቱ በክት ኢተሀቦም።

ዝበድ ዘዖታት

ኣደሚ አክል ሕድ ለናይ አማን ፈተቹ ለለአምር እቱ ወቅት፡ ዶል ተዩልል መክሩህ ቱ። እተ ዶል ለሀ ሌጣ ቱ ለክል ነፈር እትለ ናይ አማን ምክራዩ ለልትገሴ።

ጠዓሞ

ብዝሓም ምኒነ እትለ እዲነ እት ለሀንጦዋሎ ነብር፡ ምስምስ ናይ እሊ ህዩ፡ ሕነ እግል ርሕነ ሐበት ሰሀመት ክም አለበ ወሐቲመ እግል ንትጸገም አው እግል ንበድል ክም ዶእንቀድር ሰበት አተግነዕናሃ ቱ። እሊ እብ ምልሃይነ እግል ርሕነ ሕነ ሐለት ክም አለብነ ወሐቲመ እግል ነአውቄ ክም ዶእንቀድር ሰበት መሰለና ቱ። አውመ ህዩ፡ ሕነ ሐቲ ዶል ክም ጀረብነ ሰበት ኢተዐወትነ ገብእ። ገሌ እግል ትባሰር ጀርብ.. ወእግል እለ እዲናከ እብ ሰኔት ገበይ እት ሰኔት ተዩልል በድ’ለ።

በሀል

- ምን ሐዲስ እብ ብጣርከ እግል ትግበእ ትጃርብ ሐቆ ህሌከ፡ “ከአፎ ኢተዐወትተ” እንዴ ትቤ ኢትትአሰፍ።

- እት እዴከ ለህሌት እግል ኢትሰአን፡ እትለ እለ አብዴከ ኢትትሃለግ። ላመ ጃርዲን ለግሩም አረቅብ ወአረዊት ኢለሐግል።

- ምን አክራናት ርሳስ እግል ትፍረህ ኢለአትሐዜከ። ለእከ ትቀትል ጠልገት ክርንተ ኢትሰመዐ።

- ነፈር ፋሽል ይሀለ። ምናተ ምን ቅርድ እንዴ አንበተ ከዲቡ ለአማደደ ነፈር ሀለ።

- ዶል ለእተ ርሽመት ትበጸሓተ፡ ለዐል እግል ትዕረግ ፎፈእ እት ልብለክ ለሰደውክ እግል ትርኤ ገጽከ ተሐት አቅምት። ወሐቀሀ ረቢ ከዋወትከ እግል ለአሱብት አስክ ሰመ ገጽከ ርኤ።

- ምነ እት ዐመል ለኢልውዕል ዕልም ብዙሕ፡ ሐዳይ ዕልም ምስል ዐመል ለሐይሴ ዕጨት መካን ዎሮትመ እብ እበን ኢላከፋ።

- ዐቅል ወድ ሚን ኣደም እት ሰለስ ልትከፈል፡ ዐቅል ዐቢ እብ ክሱስ አፍካር ለልትሃጌ ወዐቅል ምግባይ እብ ክሱስ አሕዳስ ለለሓኪ፡ ወዐቅል ንኡሽ እብ ክሱስ አዳም ለልትሃጌ ቶም።

- ለቀዋፊት ለእት ወቅት ከረም ኢትወድቅ፡ ለትከፍከፈዮ ሐዋተ ክም ካይነት ነስኣህ። ወለዕጨት ህዩ ክም አሚነት ተሐሰቤ። ወለብዕዳት አውቃት (አውቃትለ ሰነት) ክም በዐል አከይ-ንዩት ለዐልባህ፡ ክለመሳእል ዎሮትካዬ እበ ናዩ ናሕዩት ቱ ለልርእዩን ወለሐክም እተን።

- ሐዶትከ ምስል ብዕዳም ኢተአትመግውረ። እንተ እብ ክሱስ እለ ናይ እዲነ ምግዓዝም ትግበእ መእበ ዲበ ለሳደፈያህም ተዩልል ለተአምሩ ሐቲመ አለብከ።

መዕለ-መት

ገምበሪ (ኖዕ ዓሰ ቱ) ልቡ እትለ ረአሰለ ደምቀቱቱ (ጸኔሕ።)



ቅሶት ሕሸኪቶ (7ይ ክፋል)

ኬትባይ ሙደርስ ማሕሙድ ቡመር (ወድ-ዲኒ)



ዶክቶር ከደሪ መስኪን፡ እደዩ እብ እስሮ ክርቡን እንዴ እንቱ፡ እትለ ቤተቱ ለጨባብ ላሊ እብ ሪመ እንዴ ልትሓመጥ ወልትረገስ፡ ምድር ሸድ-ወጋሕ እብ ጽብሐት ቤለ ዲቡ። ትርሃን ወሀ'መት ሰበት ትሰዳደየ ዲቡ ህዩ፡ ገጹ ርፍራፍ ሕባጥ ወደ ወፅንታቱ ገሀር ቀዬሕ ትቀየረ ከተዐናገበ። አምዕል እብ ሪመ ዲብ ሸቅል ውዕል እንዴ ዐለ፡ እብ ሰቡብለ ከልብ ሰባብ ላሊ መ ምስለ ሰበት ጨምረዩ፡ ገሮቡ ተዐናደለ። አሰቦሕ ዲብ ሞልም ለዐለ ንሴላይ ጸሓይ ብሩድ እንዴ ልትማቀኑ፡ አዜመ ለነሳብ ከልቡ ሐወጸ ዲቡ። እለ ዶል እለ ዶክቶር ከደሪ እብ ልቡ እንዴ ኢጉብእ እብ አፋሁ “ነዐ ኬራይ-----ኬር ኢትርከብ በዐል አክይድስ! ረቢ ደሐን ኢለአቴከ መክሩህ ቅሮሕ። እብ ሰቡብከ ዲብ ውዳይ ጀሪመት ቀትል አዳም ትካፊኮ ወትህመት ትወጀህት ዲብዬ። ሰበት እሊ፡ ክምሰለ ማሌ ምሴት እብ አማነት አሰፊከ እጉብእ ለአምሴኩ፡ በዐል አማን ጉብኣከ ምን ጉብእ፡ ዶክቶር ከደሪ በዐል ጀሪመት ኢኮን በል ከሸሀድ እግልዬ!” እት ልብል ምነ ትህመት ቅታል አዳም ሰበት ፈርሀ ወትሻቀለ ከአስተንተነ።

ሐቆ እሊ፡ ግናዘት አዳም ማይት ወለትህመት ቀትል ጋብኣት ዲቡ ለዐለት ዶክቶር ከደሪ፡ ቅብላት ሕድ ትረኣው። ለገልገላይ ዶክቶር ከደሪ መርሐም ጫይሕ ግናዘቱ ልባስ ነዲፍ እንዴ ሰምደት አስክ ቤት አማነ እግል ትትሳረሕ፡ ወዶክቶር ከደሪ እብ ሐያቱ፡ ዐቅሉ እንዴ ልትበጭበጭ ወልትረበሽ ቅብላት ሕድ ዐለው። ለአኬት ላኪን፡ እብ'ለ ቄትላየ ለኢተአመረ ግናዘት ሹ'ምት፡ ወእብ'ለ ህዩ፡ ለዲብ ቅታሉ ትህመት ለትወጀህት ዲቡ ነፈር፡ እምበል ልቡ አነ ወደሐንዬ እንዴ ልብል እብ ሞቱ ቦሊስ ለሐበራቡ ገልገላየ ዶክቶር ከደሪ፡ እሱር እንዴ እንቱ፡ እብ ዐሳክር እንዴ ልትዐቀብ እት ቀደምለ ሓድር ለዐለ አዳም እብ ፈጊሩ፡ ለለአተቅብል ለዐለ አዳም ለቄትላይ ህቱ ክምቱ ሰበት ፈህመ፡ እብ ሐሩቀት ዲብ ከብዱ ማይ ፋሌሕ ትባለስ እግሉ።

ሐቆ ደቃይቅ ሐድ ላኪን፡ ለቅድየት ምን መርከዝ ቦሊስ አስክ ማሕመት ክም ተሐልፍ ጉብኣት። ምን ሐረስ እሊ፡ ዶክቶር ከደሪ አዜመ፡ እምበል ዘንብ ሰድት ወለ ትትሰደደ ጽብጠቱ። አስክለ እንዴ ቀትለ

እግል ዶሉ ሕቦፅ ለሀለ በዐል ጀሪመት ልትረከብ፡ ክም ሕጹይ ፍዕላይ ጀሪመት ቀትል ወሐብስ እንዴ ጉብኣ እግል ልጽነሕ ትቀረረ። እሊ ወቅት እሊ ዶክቶር ከደሪ እብ ከብዱ፡ “ዐዳለት ክም ጀኣረት፡ አማን ክም ሐሰት፡ ወለጸሐት ክም ከይነት ለልትሐሰበ ዲቡ ወቅት መጽኣ!” ቤለከ ክም ሕሩመት ጨፎት አደንገል እት ለብተ እሳት ትኪት ትገራገመ። እበ ላጼሕ እንዴ እንቱ ለሀበየ ሐብሬ ወሐቆሀ ለጀረ ዲቡ ተየልል፡ ሰአየት ወዐዳለት ጸብረዩን። ረሀየት እግል ዲመ ለትፈንቴቱ መሰለት ዲቡ። ምድር ወሰመ ሕበር ጸልመተ እ'ቱ። እበ ላጼሕ ውዳዩ፡ ዐደድ አክ'ሉ አርወሐቱ አተዐሰ። ምናተ ዲብ ወክድ ለሀይ፡ እብ ትዕስ ለበልስ ዐለት አለቡ። ላኪን ቅብላትለ መሓሚለ ማይት ነፈር፡ ህቱመ መሓሚ በሀለት አቡካቶ እግል ሊዴ ሰበት ትሰምሐ እግሉ፡ እንፊሕ ሸቀላቱ ገሰዐከ ሀርግ ቤለ።

ዶክቶር ከደሪ ዲብ ሐብስ ክም አተ፡ ሐቆ አምዴላት ሐዳት፡ እበ ለትወጀህት ዲቡ ትህመት ቀትል አዳም ለተሀድግ ጀልሰት ማሕመት ጉብኣት። ዶክቶር ከደሪመ፡ እብ ክልኦት ሕርቱማሁ እብ ዐሳክር እንዴ ልትደረክ ወክም ከልብ ይምዩም ስልሰለቱ እት ነትል፡ ዲብ ከሌብ ሐጺን እንዴ አተ፡ ቅራመትለ እት ማዳት ቃኑን ውዳይ ጀሪመት ወእንዴ ትሰአለው ለረክበው እሰባታት ዲቡ እንዴ ረከዘው እብ ድሁር

ወእብ ውቁል ልትፋረዶ ለዐለው ክልኦት መሓምዩን ክም ለአተንሴ ጉብኣ። ለምን ዐድ ማይት ሓድራም ለዐለው ልግብኣ ወለ እምበል ዘንብ ክም ቄትላይ እንዴ ተሐሰበ ሕቡስ ለዐለ ዶክቶር ከደሪ፡ አሮቶምከ እግለ ለወክለዩ መሓሚ አተንሰ ወእብ ሰአየት ዐባይ ትጸበረ።

“ሐቱ ዶል ያጀማዐት አልኬር!” ለትብል ክርን ሐቆለ ትሰምዐት፡ ክሉ ለአዳም ትም እንዴ ቤለ፡ ለምን አዳም ዲብ አፋሀ ትንሰቅት ለዐለት ቃዐት ማሕመት፡ ክምሰለ ምድር ለዝላም ድቅብት ለጽህየት ምኑ መሰለትከ ትም ቢሐተተ። ለባልጦ ጸሊም ላብስ ለዐለ ነፈር ሐቆ ነቅመ፡ ህግዩ ክብድት እግል ልብለስ ክምሰልቱ፡ ምነ አዚምለ አዳም እኩድ እንዴ እንቱ፡ እግለ ምን ድማናይ ምንክቡ አስክ ድገለበይት ክንክልኦቱ ላዊህ ለዐለ ጽምብል ሰዐር-ሳዕሮ ሐቆለ አትሳኔ ዲቡ እንዴ አትለ “ሓይሳም ዳንያታት ወሕሹማም ዴቅበት ቃኑን፡ ዶክቶር ከደሪ እናስ ዐቢ ወዓልምቱ። ምናተ፡ ክሉ ለመዋዲቱ እብ ውዳይ ጀሪመት ቀትል አዳም ለለኣሽክዩ ወለለኣትህም ቱ። እብ ከአፎ ምንዲ ትብሉኒ ህዩ፡-

1. ምነ እሱብዳልየት፡ እምበል ሐብሬ ወእጃዘት እንዴ ተሐበዐ ለጌሳቡ ሰብብ ሚቱ፤
2. ዲብ ገይስ ልግብኣ ወዲብ ለአቀብል፡ እግልሚ መለሀይ ኢነስኣ ምስሉ፤
3. እትሊ አዜ ዲብ ገጽነ ባጥር ዲቡ ለሀለ ወቅት ምን

ጉብኣመ፡ ኤማኑ ወአማኑ ምድር ዛብጥ ክምሰል ሀ'ለ፡ ምን ረአየት ገጹ ሌጠ እግል ልትአከድ ቀድር መሰለኒ።

4. ዶክቶር ከደሪ ዲብ መሐጠትለ ቦሊስ ክም ትፈተሽ፡ ዲብ አጅያቡ፡ አሰር ዐጫቤዕ ለኢለሓልፍ ሸራባት እደይ በሀለት (ንንቲ) ጸንሐ።

5. ለግናዘት፡ ዲብ እሱብዳልየት እተ ለጉብኣ ዲብ ፈሕስ፡ ለነፈር እብ ሕጭር ትንፋሰ ማይት ክምሰልቱ ተአመረ። ምናተ አሰር አጫቤዕ ሔንቃይ ኢትረከበ ዲቡ። ሸራባት እደይ እንዴ ወዴክ ለትጉብኣ ጀሪመት ቅታል እብ ሸንቆ ህዩ፡ እተ ማይት ነፈር ለጉብኣ ልግብኣ አሰር አጫቤዕ ኢለአጸኔሕ።

ወ6. ምን እሊ እሰባታት እሊ እብ መትብጋስ ዶክቶር ከደሪ፡ ለሸራባት ቄትላይ ህቱ

ክምሰልቱ እግል ኢልትአምር እንዴ ቤለ ክም በሰር ለትነፈዓቡ እግል ልግብኣ ቀድር። ሓይሳም ውሓይሳት፡ እምበል እሊ ለቀደምኩሁ እሰባታት ትህመት ቀትልመ፡ ለትህመት ቀትል ለለኣሰብት ዲቡ ማዕሉማት ወጽበጥ ማዳት ቃኑን ለከሰስ አድለት ሀለ እግልዬ። ላኪን እግል አዜ እትለ ከፊኒ። እብሊ ለቀደምኩሁ ትህመት ጀሪመት ቀትል አዳም ለለኣሰብት ዲቡ እሰባታት ህዩ፡ እተ ጀሪመት ቀትል ለቀርበ ምጅርም ህቱቱ ለትብል ክላሰት ብዬ። ወደሐንኩም ወሰላመትኩም! እብ አተንሰዮትኩም ህዩ ሐምደኩም” ቤለ ለዐድለ ማይት ነፈር ለወክለው መሓሚ፡ እተ ቀደምለ ሓድር ለዐለ አዳም እብ ሐበን እንዴ ለአግርስ ዲብ ልትፎፈል ወልትነፈሽ።

ትተላሌ.....

ምን ገጽ 7 ልተላለ

ሰበት እሊ አካናት ቅዱም አሳር ቆሐይቶ እት ዐባይ ሸበከት ሰዋልፍ ወተጃረት ቀር አፍሪቀ እንዴ አቱት እብ ፍንቱይ እት 1ይ ክፈል ዘበን ሐቆ መትወላድ ነብየላህ ዒሰ እት እስትራትጅያይ ከጥ በሐር ቀየሕ ወክበሳታት ኤረትርዮ ዶር ዐቢ ክም ተልሀ ሸርሐ ምህምቱ።



ወቁር አሳር ቆሐይቶ


ለትፈናተ ቅዱም አሳር ቆሐይቶ ምን አክር 19 ክፈል ዘበን ወሰልፍ 20 ክፈል ዘበን እንዴ አንበተው እግል ልትወሰቆ እንቡታም ህለው። ቲዮዶር ቤንት ለትበሀለ ባሕስ አሳር እት 1893 አስክ ቆሐይቶ እንዴ መጸ ለትፈናተው እብ ትምሳላት ለገረመው አሳር፡ ወዐባዩ ናይ በዲር መባኒ ክም ከረ ኡብያት ዕባደት ለከሰስ ክቱብ ካትብ ህለ። ማክስ ሾይሌር ወሼዌይንፈርዝ ለትበሀለው በሕሲን አሳር ላቶም ውላድ ጀርመንመ እብ እንክሮም እት 1894 ይማም ከሪጠት ለትፈናተው እብ ትምሳላት ለገረመው ቅዱም መባኒ አትዳለው። እት ሰነት 1906 ለጉብኣ በሐስ ዶች-አክሱም ኤክስፔዲሽን ለልትአመር ፊራሮ እንዴ ተአክረ እት 20 ክፈል ዘበን

እብ ኢጣልዩን መትመራምረት ለጉብኣ ሕፍዝመ እብ ሕድ ለሽብህ ይማም ከሪጠት ሰወር ወለትፈናተ አሳር ትምሳላት ወአጥጥግ ክቱብ እግል አዳለዮት ሰደ።

አሳር መቅበረት ምስርዩን ቆሐይቶ

ሐቆ ሕርየት ኤረትርዮ ህዩ እት ሰነት 1996-97 እብ መትሐፍ ወጠኒ ወመጅሙዐት ዕለም አሳር እት ኤረትርዮ ለጉብኣ ሕፍዝ እት ወሳይቅ ሐድ 900 አካናት አሳር እት ቆሐይቶ እግል ልትወሰቆ ቀድረው። ምስል መትዳላይ ይማም እዳረት አሳር አካናት ቆሐይቶ እንዴ ትጸበጠ እት ሰነት 2006-07 ዝያደት በሐስ እት ወሰይቅ ትገዩሰ። እትሊ ወክድ እብ ክሱስ ቆሐይቶ ለንአምሩ እብ ዐቢሁ ምን ብሐሱ ለጉብኣ እቱ ለትወሰቆ ክቱብ ለትረከበ ሰበት ጉብኣ አሳር ቆሐይቶ እብ ቆሪን እግል ንፍሀሙ ምህም ወድዩ። አተዮት አሳር ቆሐይቶ እት ሰጅል እድንያይ ውርስ አሳር ለጉብኣ ካድም ፋይሕ ወአሽቃል በሐስ እግል ልግብኣ ወክድ ለጠልቡ ወራታት እት ጉብኣ፡ ቆሪን ለቡ ብሐሳት እብ ፋይሕ ዶር ቆሐይቶ እት መርበዮት ቀዳምያይ ምጅተመዕ ቀር አፍሪቀ እት መርሐላት 1ይ ክፈል ዘበን ቀደም ወግረ መትወላድ ነብየላህ ዒሰ ዐለይሂ ወሰላም እግል ፈተሾት ለሰዴቱ።

እብ መሰዳዳይ ውዛረት እዕላም ወመፈውድየት ዓዳት ወርያደት ኤረትርዮ ለትዳሌ ሰፍሐት



ፈሪቅ ዐጀላትኩ እት እድንያይ ጅግረ እግል ልሻርክ ቱ



ምን ዮም 17 አስክ 24 ሰብተምበር 2017፡ ነርወይ ለትትሐደሩ ዕልብ 90 እድንያይ ጅግረ ሻምፕዮን ጅግረ ዐጀላት ለሻርክ ኤረትርየ ለወክል ፈሪቅ ወጠን፡ እት ዮም 9 ሰብተምበር ምስል ርኢስ እስያስ አፍወርቂ አምሐበረ፤

እት ቀደም አድህር ለገአት ዓደት ሰርሐ፡ ሙደርብ ናይለ ፈሪቅ አሰይድ ሳምሶን ሰለሙን፡ ኤረትርየን መትባድረት ራክባመ ለህለው ቢቃዐት እብ ዓመት ወእግል እሊ ጅግረ እሊ ለገብአ መትዳለት ህዩ እብ ፍንቱይ ለኸሰስ ተውዴሕ ሀቡ፤

እት ብድረ ዐጀላት ልትሰጀል ለህለ ዐውቴታት ውበጽሕት ለህሌት ደረጀት፡ ተአምርተ ናይለ እት መጃል ርዶደት እብ ዓመት ገብእ ለህለ ፊራሮ ክምቱ ለሽርሐ ርኢስ ኢሰያሱ ዕልብ ናይለ እት ለትፈናተ እድንያይ ጅግረ ሻርክ

ለህለው ኤርትርየን መትባድረት እግል ሊዚድ ጅህድ ትሩድ ክምስል ለአትሐዜ እት ሸፊሕ፡ እት አስመረ ሌጠ እንዴ ኢልትሐ'ጩር፡ እብ ደረጀት አቃሊም ወምዴርያት በዲል እግል ርበዮት ዝያድ እግል ልትከደም እሉ ትፋን፤

መፈወድ ዓዳት ወርዶደት ሰፊር ዘመዴ ተኽሌ እብ ተረቱ፡ እትሊ ናይ ዮም ዓመት ጅግረ፡ ኤረትርየ ምን ተሐት 23 ሰነት 5 መትባድረት እግል ተአሻርክ ምን ቀድረት፡ ተአምርተ ናይለ ባጽሐተ ለህሌት ደረጀት ክምተ እት ለሐብር፡ እግል መትባድረት ዐውቴ ተምነ እሉም፤

ፈሪቅ ዐጀላትኩ፡ እት እድንያይ ጅግረ እግል ልሻርክ ቱ

ምን ዮም 17 አስክ 24 ሰብተምበር 2017፡ ነርወይ ለትትሐደሩ ዕልብ 90 እድንያይ ጅግረ ሻምፕዮን ጅግረ ዐጀላት ለሻርክ ኤረትርየ ለወክል ፈሪቅ

ወጠን፡ እት ዮም 9 ሰብተምበር ምስል ርኢስ እስያስ አፍወርቂ አምሐበረ፤

እት ቀደም አድህር ለገአት ዓደት ሰርሐ፡ ሙደርብ ናይለ ፈሪቅ አሰይድ ሳምሶን ሰለሙን፡ ኤረትርየን መትባድረት ራክባመ ለህለው ቢቃዐት እብ ዓመት ወእግል

እሊ ጅግረ እሊ ለገብአ መትዳለት ህዩ እብ ፍንቱይ ለኸሰስ ተውዴሕ ሀቡ፤

እት ብድረ ዐጀላት ልትሰጀል ለህለ ዐውቴታት ውበጽሕት ለህሌት ደረጀት፡ ተአምርተ ናይለ እት መጃል ርዶደት እብ ዓመት ገብእ ለህለ ፊራሮ ክምቱ ለሽርሐ ርኢስ ኢሰያሱ ዕልብ ናይለ እት ለትፈናተ እድንያይ ጅግረ ሻርክ ለህለው ኤርትርየን መትባድረት እግል ሊዚድ ጅህድ ትሩድ ክምስል ለአትሐዜ እት ሸፊሕ፡ እት አስመረ ሌጠ እንዴ ኢልትሐ'ጩር፡ እብ ደረጀት አቃሊም ወምዴርያት በዲል እግል ርበዮት ዝያድ እግል ልትከደም እሉ ትፋን፤

መፈወድ ዓዳት ወርዶደት ሰፊር ዘመዴ ተኽሌ እብ ተረቱ፡ እትሊ ናይ ዮም ዓመት ጅግረ፡ ኤረትርየ ምን ተሐት 23 ሰነት 5 መትባድረት እግል ተአሻርክ ምን ቀድረት፡ ተአምርተ ናይለ ባጽሐተ ለህሌት ደረጀት ክምተ እት ለሐብር፡ እግል መትባድረት ዐውቴ ተምነ እሉም፤

ፈሪቅ በሐር ቀየሕ ናይ ሰልፍ ካስ ደዋር እዳረት አቅሊም ምግብ ነስእ

እት ዮም 10 ሰብተምበር እት ስታድዩም አስመረ ለገብአ ጅግረ ደዋር-ካስ አዳረት አቅሊም ምግብ ፈሪቅ በሐር ቀየሕ እግል ፈሪቅ አዱሊስ 2 እብ 0 እንዴ ቀልቡ፡ እግል ሰልፍ ዶሉ እትሊ ካስ እሊ እዴህ ከረ።

ፈሪቅ ደንደንመ እብ ሕድ ለትሸብህ ፍገራት፡ ፈሪቅ ኮንስትራክሽን እንዴ ቀልበ ሳልሳይ ፈግረ። ፍረቅ በሐር ቀየሕ ወአዱሊስ እት ታሪክ ኩረት እግር ኤረትርየ ሰሜት ውቅል ምንመ ሰም፡ እትሊ ካስ እሊ ላኪን እዴህም ካርያም ሰበት ይዐለው፡ ክል ምኖም ለካስ ዶል ለሀርስ ሐዲስ ታሪክ እግል ልሸቄ በክት ፍቱሕ እግሉ ዐሉ፡ እብሊ ህዩ ፈሪቅ በሐር ቀየሕ እት ሄራር ኩረት እግር አቅሊም ምግብ ምዕራፍ ሐዳስ እግል ለአክትብ ቀድረ።

እሊ እት ፍንጌ ፍረቅ በሐር ቀየሕ ወአዱሊስ ለገብአ ጅግረ ድቁብ ሰበት ዐሉ፡ ቀደም ዕርፍ እምበል አግዋል ተ'መ። ግረ ዕርፍ ላኪን ለገብአት ትልህዩ እት ፈሪቅ በሐር ቀየሕ እዴ ዛይደት ሰበት ዐለት እግሉ፡ እት 57 ደቂቀትለ ትልህዩ መሃጅምለ ፈሪቅ መዋእል ተሰፋይ (ጃጂ) ቦርተሌ አዱሊስ እንዴ ሐልፈ. ሰልፋይ ጎል ሰጀሉ፡ እብሊ ህዩ፡ ፈሪቅ በሐር ቀየሕ ሕሳል ሜርሒት ተአልበጠ። ፈሪቅ በሐር ቀየሕ እበ ሰልፋይ ጎል መዐነውየቱ ሰበት ዜደት፡ እት 67 ደቂቀትለ ትልህዩ እብ መዋእል ተሰፋይ 2ይ ጎል እንዴ ደግመ፡ ትልህዩ እት ሐንቴ ምልኩ አተየ። እት አክር ህዩ፡ ለትሰጀለ ጎል ሰበት ይዐለ ትልህዩ እብ ዐውቴ ፈሪቅ በሐር ቀየሕ 2-0 እንዴ ተ'መት ፈሪቅ በሐር ቀየሕ እግል ቀደም እሊ አፍያቱ አቲ ለኢለአምር ካስ ረፍዐ።

ሾልተ ስፓንዩ እብ ዐውቴ ክሪስ ፍሩም ተምም

ወድ ኢንግሊዝ ነፊር ፈሪቅ ሰካይ፡ ክሪስ ፍሩም ዕዉት ጅግረ ዐጀላት ሾልታ ስፓንዩ ገብኡ። ህቱ እት ሐልፈተን ሰንበት ዐባይ ክራሩ ለከረ ጅግረ ዐጀላት እቱ እግል መትጃግራዩ ለዐለ ወድ ኢጣልዩ ሺንፔንሶ ኒባሊ ናይ 2 ደቂቀት ወ15 ካልኢት ፈርግ እንዴ ሐልፋቱ እግል ልትዐወት ለቀድረ። እትለ ሰነት እሊ እት ጅግረ ቱር ዲ ፍራንሱ፡ ክምስልሁመ እት ሾልተ ስፓንዩ ለትዐወተ ክሪስ ፍሩም ሐቱ ዶል እት ጅግረ ኢጣልዩ እግል ልትዐወት በርናምጅ ክም ቡሽርሐ።

ደህይ ፕሪመርሊግ እንግሊዝ ፈሪቅ ሊቨርፑል እብ ማን ሲቲ አክጀህ ትሰረክ

እት ሐልፈ ወክድ እግል ፈሪቅ አርሰናል 4 ጎል እንዴ ሀቡ፡ እግል አርሰን ሽንገር ወመተልህዩቱ ሕማም ረኢስ ክም ጸብጡ ወመአይደቱ ምን ፈሪቅ እግል ልጠረዝ ቀደም እሊ ቀዱሙ ለዐለው ጠለብ እግል ለአትሐሰሱ ዋዲ አስመን። ብዝሓም ፈተኝ ርዶደት እብ ክሰሰል ቅልብ ለትፈናተ አረእ ሃይባም ዐለው። ገሌ ምኖም መተልህዩት አርሰናል ክሎም እት ዐዳገ እግል ልትከረው ወልትዘበው ሰም እት ልብሎ፡ ገሌሆምመ ሼንገር ምን ፈሪቅ ልፍገር ቤለው።

እሊ ሸማል እሊ እት ፈሪቅ አርሰናል ለአተ ፈሪቅ ሊቨርፑል ዐለ። ፈሪቅ ሊቨርፑል እግል ሰቦ ዮም ለገብእ ወክድ ክም ዓረፈ፡ መቅደረቱ ለትከሸፍ ትልህዩ ፍንጌህ ወፍንጌ ፈሪቅ ማን-ሲቲ ሰበት ዐለት እግሉ፡ ወእት ቀዳሚት ትልህዩ ምስል አርሰናል ፍንቲት መቅደረት እንዴ አርእ 4 እብ0 እንዴ ቀልበ ሰለስ ንቅጠት ናስእ ሰበት ዐለ፡ ብዝሓም ፈተኝ ርዶደት ለእት አርሰናል ወሸቀዉ አግዋል እት ፈሪቅ ማንዩናይትድ ደግመዩ ምንገብእ፡ እብ አማን ፈሪቅ ሊቨርፑል እምበል ናይ ዶሉ ሜርሒትለ ሊግ ዮም ዓመት እት ገብእ ሐርብ ሻምፕዮን ፕሪመርሊግ እግል ለትአሻርክ መቅደረት ዐባይ ህሌት እግሉ በህለት ቱ ልብሎ ዐለው። ለበሊስ ላኪን ግረ ሳዐት 2 ናይ ምሴ ናይ ዮም 9 ሰብተምበር ቱ ለዐለ።




ትልህዩ አንበተት፡ መተልህዩት ሊቨርፑል ክምስለ ሰአየት ጋብአት እቶም ለዐለት ኢቀርበው። ኩረት ምን እገሮም እት ትሸላተፍ እት ሐንቴ መራቀብት ፈሪቅ ማንሲቲ አቱት። ክም ፍገራት እሊ ህዩ፡ እት 24ይት ደቂቀትለ ትልህዩ መሃጅም ፈሪቅ ማንሲቲ አግዌር ኩረት እት ከጥ 18 ሰበት ሀበዉተ፡ እብ ምግብ ክልኦት መተልህዩት ሊቨርፑል እንዴ ሐልፈ እቡ፡ ሰልፋይ ጎል እግል ፈሪቁ ሰጀሉ። እሊ ጎል እሊ ህዩ እት ጅግረ ፕሪመርሊግ 124 ጎሉ ገብእ እት ህሉ፡ ምን አሮብ ለኢኮን መተልህዩይ ወእሊ ዕልብ አግዋል እሊ ለአሰጀለ እንዴ ትበህለ ስሙይ ህለ አግዌር።

ግረ እሊ ትልህዩ እሊ ህዩ፡ ሐረከት ሰኔት ለአርኤ ለዐለ መተልህዩይ ፈሪቅ ሊቨርፑል ማኔ ምን ረዩም ለትሸወተት ኩረት እግል ለዐሬ እንዴ ቤለ ገጽ ቦርተ ማን ዩናይትድ ፈርጽ፡ እሊ ለረኦ ሐከምለ ትልህዩ ኢረሐመዩ። ከርት ቀይሕ እንዴ ሀበዩ ምን ሜዳን ጠርዘዩ፡ ምናታ ማኔ ሊጠ ኢኮን ምን ሜዳን ለጠረዘ፡ መቅደረትለ ፈሪቅመ ሐቀሁ ምርኤክ ረኢስ ገብኡት።

እብ ክሰሰ እሊ ረአዩ ለሀበ ፔፔ ጎርድዮላ “እብ ዓኔ ቦርተ እግል ልዝበጥ ለወደዩ ኢመስሰኒ ማኔ፡ እግልሚ፡ አሰር ኩረት ሌጠ ልሰዓ ሰበት ዐለ፡ ለትህዩበዩ ከርት ላኪን ወጀቡ መኢፋሉ ይእደሊ” ቤለ።

እብሊ ህዩ፡ እብ ያለጢፍ ልተልሄ ለዐለ ፈሪቅ ሊቨርፑል ዐስተር ሰበት ትበከኦት እቱ፡ እብ 10 መተልህዩይ እግል መዐነውየት ውቅል እንዴ ጸረ ዕንዱቅ እቱ ለዐለ ፈሪቅ ማን-ሲቲ እግል ልክረዕ ኢቀድረ፡ አዜመ 2ይ ጎል እት ሕዱድ 40 ደቂቀትለ ትልህዩ እት ሸግዲት ሊቨርፑል ትወሸቀ፡ እብሊ ህዩ ትልህዩ 2 እብ 0 እግል ዕርፍ ፈግረው ምን።

ግረ ዕርፍመ ፈሪቅ ማን-ሲቲ ለቀድሮ ትሰኣኑ። እብሊ ህዩ ሰለስ ጎል እንዴ ወሰከ 5 እብ 0 እንዴ ቀልበ ታር ፈሪቅ አርሰናል አፍገረ። እምበልሁመ እት ፍንጌ ሻምፕዮን ፕሪመርሊግ ሰነት 2015/2016 ወሰነት 2016/2017 ለገብእ ፍረቅ ሌሰተር ሲቲ ወቼልሲ ለገብአ ጅግረ፡ ፈሪቅ ቼልሲ 2 እብ 1 ቀልበዩ። ፈሪቅ ማን ዩናይትድ ወፈሪቅ ስቶክ ሲቲ እብ ናይ ሕበር ዐውቴ 2 እብ 2 ልትፈናተው እት ህለው፡ ፈሪቅ አርሰናል ምስል ፈሪቅ ቦርንሞውዝ ለወደዩ ትልህዩ ዲበ 3 እብ 0 ሰበት ቀልቡ፡ ምን ዐለ እቱ ድቁጣት አተንፈሱ። ፈሪቅ ቶተንሃም እግል ፈሪቅ ኤቨርተን 3 እብ 0 ቀልቡ እት ህለ ህዩ፡ ፈሪቅ ሳውዝዝምፕቶን ወፈሪቅ ዋትፎርድ ህዩ 0 እብ 0 ሰበት ፈግረው፡ ሐት-ሐቱ ንቅጠት ረክበው።



ደመሚት ምን ዐነጺት ለፈርህ እቱ ዘመን መጽኦ



እብ ክሰሱ ሓዋናት ሕፍዝ ለትወዴ መጀለት አልማንዩ ክምለ አፍገረቱ፡ እትሊ ለህሌነ እቱ ወቅት ቀደም እለ ለአሰኬ ወለአፈርህ ለዐለ ሓዋናት እት ፈርህ መጽእ ክም ሀለ አከደት። እብ አሳሰ እለ ደመሚት ቀደም እለ እብ ክርንቱ ሌጠ ዐነጺት ምሽራቡ በጼሕ ክም ዐለ፡ ሓቀ ገሌታይ ምስል ዐነጺት ምስንዮት እንዴ ወደፊደመሚት

ፈረንጅት ጠባዬዕ አዳም እብ ዕንታቱ

ጠባዬዕ ወድ አዳም እግል ፈረንጅት እበ ወዴተ ሓቱ ምኡምረይት ዕልም ነፍሰ ፈረንሳ፡ ወድ አዳም ወእብ ፍንቲት አንሳይት ጠባዬዕ እብ ዕንታተ እንዴ ወዴከ ከፎ ክም ፈርጉ በሐሰ ወዴት። እለ ድራሰት parapsychology ምን ኬን ዕልም ነፍሰ ተ ትብል ለዐለት።እብ ገበይ እለ ድራሰት ዎሮ ነፈር እብ ሸክል ዕንታቱ፡ ለእግሉ ፊቱ ሓባር አው “ሰባቅ” አሸካል ክምሰልሁም አምዕል ወሬሕ ወሰነት ለእት ትወለደ እንዴ አመርኩ፡ ምን ክም ቱ ወምራዱ ወጣባይዎ ከአፎ ክምሰልቱ እግል ትፈርግ ለተአቀድረካት እት ትብል፡ እግል ወዴተ ድራሰት ወዴሕ። ከእግል ዮም ሓባር ዕንታት ወጠባይዎ እግል ንርኡቱ።

እለ ለተሌ አምሰላት እንዴ ርኤነ ምስል፡ ሓባር ወሸክል ዕንታትነ ነአትመጣውሩ ወፍገራት ጠባይዕነ ነአምር።

ሕብር ዕንታት	ተርጀመት ጠባይዕ
ዕንታት ጸሊም	ዕንታት ጸሊም ለሰም፡ ካጥሮም አገድ ለልትከ'መሀ፡ ቅንእ ትርድት ለሰም ርሒማም ቶም። አሰክ ልሰም ወዐቅሎምም አገድ ልትጀረሕ።
ዕንታት ቡኒ	እለ ለሕብሩ ዕንታት ለሰም አንፋር፡ ምስለ እለሰም ግርመት ወፍቲ ሸቅል፡ ክጅል ወረሐመት አግደ ምን ጣባይዎምቱ።
ዕንታት አክደር	ዕንታትም አክደር ላቶም አንፋር፡ ምስለ ለእሉ ሰም ድቁብ ምራድ፡ ሰብ ተሓቲት ወከያነት ቶም። እምበልሁም ረሐመት ርፍዕት ምኖምተ። ምናተ ጽንዓም ወፈተች ሸቅል ቶም።
ዕንታት ሸግራይ	እለ ሕብር ለሰም አንፋር፡ ሃድአም፡ ሰብ ሰብር፡ ብዙሕ ለፈክር፡ እብ ናይ በረ ግርመቶም ለልትዐጀሶ ወምራዶም ለለሐብዶ ቶም።
ዕንታት ሊኒ	እለ ዕንታት ለመልኮ አንፋር፡ ዳይዓም፡ ክጅል ለአለሰም፡ ፍቲ ነፍሰ ለሰም፡ብዙሕ ለፈክር፡ ከሀላት ለይአለሰም፡ ሰብ መዛጃት ወኬፋትቶም።
ዕንታት ጨብላይ	ዕንታት ጨብላይ ለሰም አንፋር፡ ዲመ እብ ሐሊት ወጽንዒነ ለለአምኖ ቶም። ከአዩ ምኒነ ሕብር ዕንታቱ ምስል አሰዉ ክም ልትረተብ እንዴ አመረ ጣባይዎ ልጌምም ወእበ ትትቀደሩተ ጠባይዎ ልሰዩሕ።

እተ አሮ ርክን ናዩ ቤት እት ሀሌ፡ ለዐነጺት እተ ካልኣይ ርክን ቤት ልተልሄ ወዐፍሽ ለአከርብ ክም ዐለ፡ ለመጀለት ተአሸር። አዜ ላኪን፡ ደመሚት ምን ክርን ዐነጺት እንዴ ፈርህ ምሕብዑ ወዴ እቱ ለሀለ ወቅት ክምሰል ዔረ ለጉብአት ድራሰት ወድሐት። ለዐነጺት እት ዘርኡ አትሳናይ ሰበት ጉብእ እቱ ለሐጠር እግል ልምለክ ቀድረ እት ልብሎ ዑለማእ ሓዋናት ለአክዶ። ለዑለማእ እንዴ አትለው፡ እት ጉብእ ለሀለ አትሳናይ ዘርእ ለአግደ ሆርጥናት ናይለ ሓዋናት እት ልትቀያር መጽእ ሰበት ሀሌ፡ ፈርህት ለትብሀል በዴ ምኡ ክም ሀሌት አሸረው። ለባሕሲን እተ እሉ ወደው ሕፍዝ ደመሚትመ አክላብ ለአፈርህ ክም ሀሌ፡ ወሐሻይል ምን ሀቡይ ለሀርብ ወሰኬ ክም ሀለ አሸረው። እትሊ ወክድ እለ፡ አው-ከደን እንዴ ትብሀል ለልትአመር፡ ክም ከረ ከረች ወአወንን እት ሽዑብ ለሳክን እቱ መዳይን ለአቱ ወምሰል ወድ አዳም ምስንዮት ለአሰስ ክም ሀለ ትወድሐ።

እግል ሰሓቅ

ወለት 50 ሰነት
አሮት ነፈር፡ ሓቱ 50 ሰነት ለዕምረ አቡቱ ሐመት እቱ ከአሰክ ሐኪም ጌሰ እቡ። ለሐኪም እብ እንክሩ፡ “ለእሲት ጭንትሮ ሰበት በሕተዩ፡ ምስለ ለናሰብ ወሰነተ ላቱ ወድ 50 ሰነት እናሰ አትሀድዩ” እት ልብል መክረዩ።

ለእሲት እብ እንክረ ወድ ወለቱ፡ “ሕልብዬ ወድ 50 ሰነት ሐቆ ኢረከብከ ኢትትአሰፍ ምን ዕምር 25 ክልኣት ነፈር ምን ረከብ እግልዬመ ይኣቤ” ቴለቱ ልትብሀል።

እግል ነአምሩ

ለትወቀለ ርዝቅ- ኤማን ለቀለ ርዝቅ- ዓፍዩት ለዐበ ምስክነ- በቲክ ሰአዩት ለዐቤት ሰዳይት- ረሕመት ለአኬት ከያነት-ጥልም ለትኬለመት ቅዌት- ጀሀል ለዐበ ከጣእ- ጌጋክ ኢመትከባት

አነ

ዮም 11/6/2016 ሳዐት 6.00 ሐ.አ አሰመረ
እት ፊሎሱፍ ለቀርቦ ጅን ንኡሽ ክምቱ እሰምዕ ዐልኮ፡ ለሰብብ ላኪን እክድት ምኡ ይኣነ። እብ ክሰሱ ፈልሰፈት እግል እቅረእ ምን አነብት ላኪን ሰነቹ እድውርት ሀሌከ። ፊሎሱሰ አው ፈልፊሰ ለልትብሀል ነፈር መትዐጅባይ በሀለት ቱ። እብ ካልእ ህግዩ መትዐጅብ እብ ልብ ክርዩት ሰበት መጽእ፡ እግል ትትፈክር ሰልፍ እግል ሓጃት እት ረዋገት ወመትኢያሰ እግል ትርኣዩ ክም ብከ እሙርቱ። ከእት ፊሎሱፍ ለቀርቦ ጅን ንኡሽ ቱ ልትብሀል እት ሀሌ፡ ዲመ ነኣይሽ ልብ ከፊነ እቶም ምን ጉብእ፡ እግል ለጉብአት ሓጃት ከደነ ወከርሰ እግል ለአምሮ ለሐዙ። እግል ለአምሮ ጉብአው ምን ጉብእ ህዬ፡ ላዝምቱ እብ ሕሰር እግል ልዕፈው ወእብ ክሰሱ እግል ልሰኣሎ። እለ ክሉ እግልሚ አምጽክዩ ትበው? ምን ክልቀቹ ህግያዩ ብዝሕት ምንማተ፡ ዮም ላኪን እብ ሀደፍቱ ለእትፈላከም ሀሌኮ። አነ በዲር ብዙሕ ይእትዐጀብ፡ ሰብብ ኢመትዐጅብዬ ላኪን ለለአትዐጀብ ሰበት ሐገልኮ ኢኮን፡ ሚደአም፡ አነ እግል ለአትፈክር ሓጃት ልብ ሰበት ኢከፊኮ እግሉቱ። ለኢለአትፈክር ኖሱ ሚሀለ? እት ትብሎ ለትትፈከሮ እትቹ ፊሎሱፋትመ ኢትትሐገሎ። ‘ኩሉ ሓጃት ክም መተርጅማዩቱ’ ለትብል ሕክመት ዶክቶር ዋይኔ፡ ገለብ ምን ከወኒ ሕሚትኩም እግል ኢደዩ ሐዜ። እበ ጉብአት ዐለም መትዐጅብ እምብትተ ሀሌኮ። ቀደም ክሉ ላኪን እት ነፍሰዬ እትፈክር ሀሌኮ። አነ አንሳይት እብ ግብኣቹ ሕብንት ምንመ አነ፡ እት ገሌ-ገሌ ላኪን አፍካርዬ ድዒፍ ዐለ። እግል መሰል ክሉ ወድ ተብዐት እግል ሊደዩ ለቀድር፡ ፍክር ታምም ወቅወት እት ብዬ እዳዬ አትሐጭር ምኡ ክም ዐልኮ ለአትዐጀብኒ ሀሌ። እለ ለአንተሀዘው ውላድ ተብዕን ህዬ፡ እግል ኣኪደት ለይአለቡ እት ለመድ ለተንከበ ድንጉር አፍካር፡ እት ፍንጌዬ ወፍንጌ ሀደፍዬ ድፈዕ ክም ጉብእ ሰደዉ። ኢለአትዐጀብኪ ዳያሪዬ? ላኪን ለሰብ ኖሰነ አነ ወለመሰላኒ ሕነ። እግልሚ ምን ትብሊኒ፡ አነ ወለመሰላኒ ድድለ ሀሌት ሐቂቀት (ዋቂዕ) እንፈክር ሰበት ጸንሐኩ። እግል መሰል፡ ተአሪክ ንዳልነ ርኤነ ምን ጉብእ፡ ተረት አንሳት ምን ነአተርፍ ምኡ፡ ተኣ ጉብእ በሀለት ተርጀመት ልሰእን። ከአነ ምን ክም አነ ርሕዬ ሰበት ረከብኩ፡ ምስል እለ ናይ አማን አነ (ጃሚለ) እግል አትኣምረኩም ስምሐ እግልዬ።

አነ . . .

አነ ክታብ አነ ቅርኡኒ
አነ ተአሪክ አነ በራብሩኒ
አነ ረሕመት አነ ምን ፋጭሉኒ
አነ ሰብር አነ ምን ወርሱኒ
አነ ቃድዮት አነ ምጽኡኒ
አነ መቅጠን ብዬ ምንመ ትብሊኒ
ዶለ ድመልዬ ላኪን ዋለጠኒ።
አነ በርህ አነ ትከለለኒ
አይወ አነ ወለት አንሳይት
ሕራብ ጋሻይ ወገይት
ኩሉ መታክል ቂድራይት
ናይ መጅተምዐ ሚርሓይት።

10 ፍንቲት ርከብ

